

VETUS. (J.)

ORATIONES IN MEDICINAE
COMMENDATIONEM, etc.

Suppl

Vol. 10



Medicine

6. A. 1.

IOAN. VETERIS
ORATIONES IN MEDICI-
næ commendationem, & in gratiam
octodecim Medicæ laureæ Candidato-
rum institutæ, ac in eorundem scholis
per tres cōtinuos dies habitæ, in quibus
perpetua gymnasiorum corporis & ani-
mi comparatio explicatur.

Ad amplissimū virum D. AEGIDIUM BORDINUM
Regij iuris in suprema Curia Cognitorem & Procu-
ratorem fidelissimum.




PARISIIS,
Apud Federicum Morellum, in vico
Bellouaco, ad urbanam Morum.

1560.

CVM PRIVILEGIO REGIS.






2405

3

IOANNES VETVS AM-
plissimo viro D. Aegidio Bordino Re-
gij iuris in *Suprema Curia Cognitori*
& Procuratori fidelissimo S.

 Ostquam in Medicina
Candidatorum causa,
quam beneuolè luben-
tèrque susceperam, mul-
torum mēsum laborem
uigiliāsque satis ardentèr consumpsissem,
cæpi apud me absoluti operis rationem
aliquam subducere, ac ægrè interdum
ferre, quòd tantum temporis in re honesta
quidem & laudabili, sed minus fortasse
profutura, transmisissem. Neque enim
eum me, & ea conditione natum reputa-
bam, qui liberè in suauioribus Musarum
hortis & scriptione feriari sine summo
possem detrimento: sed qui potius in po-
sterũ prospicere, atque, dum isto per tuam
benignitatem otio perfruor, alicui vitæ

*instituto mea consilia, curas, diligentiam
penitus consecrare deberem. Contrà uer-
sabar animo nihil commodiùs accidere
potuisse, quàm quòd aliquando præsen-
tissimum mea erga tuam dignitatem ob-
servantiæ palàm testificandæ argumentũ
occurrisset, cuius captãdi nonnullam oc-
casionem cupidè iampridem aucupabar.
Quare, tametsi ut nostræ lucubrationes in
lucem uenirent, plerique ideo postularẽt,
quò ritus istius preconij (quem vulgò Pa-
ranymphum uocãt) exteris innotesceret:
tũ ut nostris, qui hoc idẽ ingenij discrimẽ,
quo perfuncti sumus, ingressuri sunt,
imitationis exemplum proderetur (fit e-
nim ut è portu soluentibus, ij qui iam in
portum ex alto inuehuntur, præscribant
& tẽpestatum pericula, & prædonum,
& locorum) fateor nihilominus me non
magnoperè his rationibus incitatũ, præ-
sertim cùm mediocritatis meæ conscius,
modestè, ut omnia soleo, agnoscam hoc
opusculum*

opusculum non esse tale, ut in arce, quasi Minerua illa Phidiæ, collocari reseruariq; mereatur. Verùm ego ingrati & illiberalis animi crimen, quo nullum turpius placuit antiquis inter homines grassari, non horream? Ego de te, quem uerè patronum, quietis meæ authorem & alumnum appello, cuius incredibilem in vniuerso disciplinarum & linguarum genere doctrinā, memoriam singularem, prudentiam penè diuinam quotidie obseruans amplector, tādīu cōticescam? Equidem duo mihi semper ob oculos proposui, ubi primū in tuam clientelam domūque accessi: alterum, ut existimationi & virtuti tuæ obsequiosè inseruirem: alterum, ut in Iacobo Bordino, filio tibi unice charo, industriā omnem & neruos adhiberem: quorum utrique ita officiosè nauabo, ut cū clientem tibi fidelissimum, tum filio magistrum studiosissimum sentias delegisse. Accipies igitur hoc quan-

tuluncunque uigiliarum nostrarum munus, quod cū in tuo nomine apparebit, ex eius hominis officina exiisse uideatur, qui quamcūque bonarum literarum suppellectilem possit unquam depromere, iam inde acceptam tibi & debitam ultrò concedat. Bene uale, & nos, ut facis, liberaliter foue.

Εἰς τὰς ιη. ἰατρ. Ἰωάν. Γαλατῖς.

Ἰκτῆρ' ἔμελναι πολλῶν ἀντάξιον ἄλλων
 Μαιονίδης πάντων μάντις ἄριστος ἔφη.
 Πολλάκι μαστέων γνώμης τ' ἀληθέα μύθον
 τῆςδε, τόδ' ἀρεκέως αἰτιον δῖρον ἔμελν.
 Ὅννεκα τοῖς μερόπεσιν ἀλεξητήρια νόσων
 οἷος ἔφυ παρῆχεν ἄμβροτος οἷα θεός.

Δ. τῷ Αὐγλητῖς.



ORATIO PRIMA.



Vod à plerisq; fieri consuevit, Auditores grauissimi, ut initio dicēdi rationem reddant qua de causa quidque moliantur, id mihi hodierno die

video esse faciendū, ne si susceptionis meæ consilium uobis obscurum sit, temeritatis aut imprudentiæ plenum uideatur. Quamquam non adeò aut uehementi gloriæ studio, aut inconsiderato iudicio fui, ut cū de hoc munere subeundo ageretur, nō antè cogitatione prospicerem qui concursus hominum futuri essent, quantam expectationem rei magnitudo allatura, quantam audiendi cupiditatem loci celebritas iniectura, quantam denique orationi meæ difficultatem octodecim Iatrogenistarū existimatio esset concitatura. Sed ne uos quidem in dubium uenire arbitror, quin ego his tot & tantis rebus permotus, unà cum

spe perficiendi, suscipiendi quoque uoluntatem abiicere debuisssem, nisi fortè me bonus aliquis genius cõfirmatum ex isto fluctuantis animi errore in uiam reduxisset. Cùm enim arduum quoddã onus esse intelligebam, profiteri me omnibus silentibus unum grauissimis de rebus frequentissimo conuentu auscultandum, proptereà quòd, ut est hominum genus nimis acutum, uitia in dicente acriter perstringuntur: tum uerò mihi nõdum satis instructus uidebar, qui ea omnia, quæ demonstrari conueniret, & diligentia consequi, & oratione expromere, & memoria complecti, & spiritu ac uiribus sustinere possem. Veruntamen nonnulla huiusce contentionis opinio & uoluntas iampridem menti meæ infederat, quòd quamplurimos literarũ humaniorum doctores meminisssem ex isto primùm loco innotuisse, summamque nomini suo nobilitatem peperisse. Quapropter honorificum mihi fore iudicabam, & ad ineundam multorum amicitiam eximium, si docendi munere similiter in hac Academia perfunctus, extremũ adolescẽtiæ tyrocinium, omnesque industriæ neruos in eorum commendatione ponerem, qui

qui mihi ipsi aut doctrinæ initium, aut familiaritatis suæ fructum aliquando contulissent. Sic enim se res habet, Auditores grauissimi, ut si longissimè spatium præteriti temporis, pueritiāq; recordari ultimam uelim, ex isto octodecim Iatrogonistarum numero paucos reperiā, qui me aut ingenio & præceptis suis non iuuerint, aut obsequiis & necessitudine mirū in modum deuinxerint. Quamobrem ut oblatae prouinciæ magnitudo, ut obrectatorum importuna consuetudo, ut etiam laterum uocisq; infirmitas me hoc aditu laudis prohiberent, quoduis tamen laboris & famæ periculum potius adeundum, quàm à sperata beneuolentiæ & beneficij referendi gratia discedendum putauī. Quid enim illorum cohortationibus aures dedidissē, qui tam singulare præconium irritā unius hyemis operam appellabāt, mihiq; longè rectius consultum sentiebāt, si tam diuturni temporis usuram priuatis meis studiis & commodis impēderem? Neq; enim is sum, qui omnia quæcunque agimus sic ex nostro emolumento pōderanda censeam, ut cætera, quæ minus ad quæstū conferunt, quanuis honesta sint, repudiari putem

tem oportere. Hanc sanè animi mei pro-
pensionem non modò laudauit, sed etiam
promouit Meccœnas meus Aegidius Bor-
dinus, Regij publiciq; iuris vindex & pro-
curator uigilantissimus, cunctisq; litera-
rum & sapientię dotibus ornatissimus: qui
postquã detrectationis meę excusationem
reiecisset, spemq; attentionis & patientiæ
uestræ amplissimam obiecisset, me in eam
demum sententiam impulit, ut in octode-
cim Iatrogonistarũ encomio iam iam mei
ingenii uestrorumq; iudiciorum aleam
multò lubētius periclitarer. Quo loco mi-
hi ferè idem quod Romanis Oratoribus ui-
deo contigisse, ut quemadmodum sæpè a-
ctionem, quam uno die integram perorare
non poterant, in plures partiri cogebr̃tur:
sic trium mihi dierum audiētia impetran-
da sit: ac idcirco certos fines terminosq;ue
describam, & totam causæ meę dictionem
tres in partes diuidam, ut ad dierum nu-
merum æqualis partium numerus accom-
modetur. Et quoniam quid primum, quid
secūdum, quid ultimum in singulis rebus
Natura definiuit, hodierno die currentes,
armisq; inter se mutuis cōfligentes Athle-
tas in arenam & puluerem educemus: al-
tero

tero, gloriosos sacrosancti Olympiorū certaminis uictores in populi conspectu proponemus : tertio, ad laureā, & ad promeritam laborum mercedem dimittemus. Atque hæc sunt, Aud. grauis. quæ pro meo officio, uestraq; (ut opinor) expectatione, trium dierū momento ad hanc prouinciam constituto explicanda suscepi: sed ad ea priusquā aggredior (siquidem à Diis immortalibus capiēda sunt agēdi primordia) Christum Opt. Max. precor quęsoq; ut in tanta difficultate & angustiis suo robore infirmitatem meā subleuari patiatur: deinde uos etiam, quorum authoritatem sanctissimam semper duxi, oro atque obtestor, ut si quid uerecūdius & depressius dixerō, non tam inscitiae, uel timori, quàm Naturæ, quæ, ut nihil omni ex parte absolutum esse uoluit, unicuiq; suas maculas, mihi aliquam pectoris & clamoris imbecillitatem iniecit, pro uestra æquanimirate condonādum statuatis. Cū benignissimus cunctarum rerum parens atque largitor Deus, quē ueteres, ut plurimum, Naturam nominarunt, duabus partibus, uelut dotibus maximis, hominē donauerit: tum egregias in eo studiorū & uirtutū fa-

cultates

cultates ingenerauit, quibus nō modò uictum, uerū etiam uitam honestè propagaret. Etenim si quasq; tum corporis, tum animi uel minutas particulas perscrutari uelimus, nullā haud dubiè ui ad agendum aliqua uacuam ac inertē reperiemus. Quæ ratio unūquēque admonere debet, ut cū à Deo corpus & animum, tāquam agrum diligenter excolendum acceperit, ita se in eo & seipso exerceat, ut copiosissimos atq; uberrimos fructus domino exigenti cū fœnore remetiat. Quid enim turpius, & nomine humano indigni⁹ fingi potest, quàm ut in isto communi theatro uitam absque opere, absque cura, absq; officio, desidem, liberam & otiosam more belluarum silentio transigamus? Equidem mihi persuadeo Auditores grauis. optimè quondam in Græcorū ciuitatibus obseruatum, id quod à Dracone primū dicitur fuisse sancitū, τὰς τῆς ἀργίας ἀλόντας ἀποκτεῖναι: quæ lex etsi paulò asperior uideretur: tamen cū eam Solon mitissimus corripiebat, otij cōuictis sempiternam infamiæ labem reseruauit. Illud nempe legislatores sapiētissimi multo usu compertum habebant, ignauiam omnium flagitiorum esse illecebram, quia

si quispiam nihil ageret, de malè agendo eum cogitare oporteret. Quamobrem in nostra quoque Rep. quæ partim ex Atheniensium & Romanorum moribus compacta, partim salutaribus Regū Christianissimorum consiliis stabilita & corroborata fuit, eam hodie uiuendi formam retinemus, ut alij assiduo in artificio atque opere uersentur, alij diurnis nocturnisque pro salute ciuium ærumnis cruciētur, pauci omnino cessatores inueniantur, nisi fortè barbari quidam & peregrini, qui in has imperij Gallici inuiolatas sedes sua nobis ueneficia, & fœdissima uoluptatum lenocinia inuexerunt. Sed ut externa prodigia relinquamus, in nostro populo hēreamus, & quibus se maximè rationibus expolire didicerit, reuocata maiorum consuetudine deinceps quàm fieri poterit breuissimè differamus. Id enim mihi iam inde ab initio propositum fuit, ut pomeridiano huius lucis curriculo de gymnasticis corporis & animi exercitationibus dicerem, sine quibus nec Oratores faciūdiam, nec Iurisconsulti scientiam, nec Imperatores militādi peritiam, nec hi deniq; Iatrogonistæ tantū gloriæ scopum ullo modo contingere potuissent.

tuissent. Quocirca maiores nostri, quorū
omnis ad salutē Reip. intenta erat sollicitu-
do, illud imprimis accuratē obseruari stu-
duerūt, ut perpetuis laboribus curisq; ado-
lescētes à prima ætate assuescerent, quò &
in exequendis negotiis prudentiores, & in
perpetiēdis periculis ualidiores atq; robu-
stiores redderentur. Atenim non ista uete-
rum institutio putāda est, sed à Deo uni-
uersis rerū formis uel ab ipsa æternitate at-
tributa necessitas, ut non tantū homines
& belluæ, uerūetiam cætera muta atq; ina-
nima muneris alicuius colendi efficiēdiq;
gratia, nata & in lucem edita fuisse intelli-
gātur. An nō uidemus in ordinatione or-
bium cælestiū sydera & stellas impulsu mo-
tuq; indefatigato cieri: solem, lunam, reli-
quosq; circulos perenni cursu incitari: ni-
hil denique in cælo animaduerti, quod
non celeritate mirabili conuertatur? Ac ut
terra, quæ medium mundi locū ambit, &
in quam omnia grauiora relabuntur, suo
pondere immobilis maneat: tamen perspi-
cuū est ab ea fruges, & baccas, & pecudes,
partim ad utendum, partim ad uestendum
procreari: quæ si nō fodiatur, manuq; & a-
ratro diligētissimi agricolæ identidē subi-
gatur,

gatur, nō modò fructus nullos gignit, sed arida quadā sterilitate consenescit. Ergo sine motu & usu terrā deteriorē fieri, aërem corrumpi, ignem extinguere, aquam putrescere iudicemus: Animal autem illud prouidum, sagax, multiplex, acutū, memor, plenum cōsiliij & rationis, quem uocamus hominem, præclara conditione à summo Deo generatū, inertia & desidia torpere cōcedemus? Alia fuit Laconum iuuentutis instruendæ disciplina, apud quos tanta exercitationis cura suscipitur, ut in niuibus rigere, in montibus se uri, siti & inedia tabescere, cæstibus contundi citius patiantur, quàm uel dolorē, uel laborem molestum esse fateātur. Id quod iidem pariter in fœminas transtulerunt, quas non, sicut aliis in urbibus, mollissimò cultu parietū umbris delitescere, sed in palæstram, in solem descēdere frequenter uoluerunt, ut paulatim affuescentes, quoddam labori callum obducerēt. Eodem modo Persarum iuuenes in uenatione, ferisq; persequendis & figendis exercebantur, ut hac prolusione cōdiscerent, quales se in hostili prælio exhiberēt. Quid uerò Atheniēses & alios Græciæ populos commemorem? Etenim cū multa

multa à Solone Atheniensium ciuibus sapientissimè tradita, tum nihil unquā consideratius inuentum fuit, quàm illæ gymnasiolorum antiquissimæ leges, quæ totā informandæ adolescentiæ regulā formamq; continebant. Hinc paucis, pòst, tēporibus effectum est, ut Græcorū culta gens & expolita nationes exterarū meritò barbaras nominaret, easq; omni pacis belliq; literarū & armorum gloria superaret. Hinc Miltiadistrophæa, Themistoclistriūphi, Demosthenis flexanima oratio, Isocratis iucūda suauitas, ac innumerabiles in quoque scientiarū genere uiri excellentes prodierunt, qui nisi suas ad discendū faces posteris prætulissent, etiānum illorum mentes densissimis inscitæ tenebris obuolutæ iacuissent. Solon igitur, ut ad institutū reuertamur, puerorum educationem matribus, nutricibus & pædagogis componendā permittebat, ut simul cum lacte humanioribus disciplinis imbuerentur: deinde ubi iam grandiores adoleuissent, eos solidioribus Philosophiæ cibus ali, uicissimq; luctatione, cursu, saltatione, disco, iaculo agitari præcipiebat: quā sedulitate animi solertiam acui, & uitia corporis emendari posse

posse confidebat . Sic enim solent agrorum cultores tenellas & humiles plantas contegere , nonnullisq̃ue circùm præsidiis munire , ne uenti cæliq̃ue uiolentia confringantur : at ubi iustum incrementum ac robur collègerunt , luxuriantes ramos amputant , ipsasq̃ue radices quibuscumlibet iniuriis & tempestatibus concutendas obiectant . De quo legislator plenissimè apud Lucianum cum Anacharside altercatus , duas præsertim huiusce rationis utilitates explicauit : unam , quòd exercitati iuuenes quælibet discrimina intrepidè adirent : alteram , quòd & prospera diutius ualetudine fruerentur , & morbos ocyus à suo capite propulsarent . Quòd si medico mihi more philosophari , & uobiscum paulisper ratiocinari liceret (id quod in lectissimò ἀρχαίων confessu non audeo uindicare , ne gestū agere tot in scena Rosciis spectantibus arrogans & insolens uideatur) quod quæso , Aud. grau. morbi genus grassari potest , quod non humorū redundantia & peccato imputetur ? Vnde autem istud uitium aut in quibus potissimum hominibus deprehenditur ? Vtrum in baiulis , operariis , & laboriosis artifi-

bus? An non crebrius in locupletioribus, qui uitam sedentariam degūt, lauto uictu, neque molestiam, neque pondus ullum experientes? Itaque mihi aliquādo rimanti, & mecum animo penitius reputanti, quamobrem illi succo integro & æquabili sanitate recrearentur: isti quotidianis penè morbis conflictarentur, talis demum succurrit ratio, quòd exercendo inanes ciborum reliquiæ cruditatésque dissiparentur, non multò secus, quàm ventilando paleis & lolio triticū perpurgaretur. Plato, postquam libris *νομοθετίας* de gymnasio utrinque multa quæsiuisset, lege postremò cauit, ut publici à ciuitate magistri conducerentur, qui pueros & puellas, viros & matronas, omnes iaculandi, equitandi, præliandi species, technásq; edocerent. Nam præter quòd ad bellum postea paratiores futuri essent, tum, sicut in Timæo apertè loquitur, nullam ægro corpori medicinam motu gymnastico salubriorem posse adhiberi existimauit. Quare Græci, qui non paruos inde fructus decerpi, suæque genti maximam apud vicinas authoritatem conciliari videbant, de populi & optimatum consilio sanxerunt, ut ex xyisto in arenam, ex præludio

præludio in certamen res ipsa deueniret. Hinc illi Olympiorum, Pythiorum, Nemeorum, Isthmiorum quatuor sacri ἀγῶνες inualuerunt, & quinto quoque anno per quinque dies continuos ingenti celebritate constitui cœperunt, qui olim ab Hercule, Apolline, Ophelte, Theseo excogitati ferebantur. Hinc Athletæ, pugiles, cursores, quinquertiones, & ij quorum opera in pancratio consumebar. Quem postea morem asserentes Romani, cum pleraque de libris Solonis & Lycurgi suas in tabulas transtulissent, tum ludis publicis cauea circôque diuisis, corporum certationes lucta, curriculisque equorum, & pugilatione fieri permiserunt. Sed hoc tamen inter illos interfuit, quod Athenis ingenui ad Reip. salutem liberalissimè instruerentur: Romæ, serui ad multitudinis libidinem crudelissimè deuouerentur. Quid autem de nobis, Aud. grau. & de nostris contentionibus dicam? Vtrum tale quiddam ab antiquis mutuati sumus, an uerò nouam exercitationis formam nostris moribus & ingeniis conuenientem effinximus? Etenim cruëta spectacula, qualia Romanorum nonnulla memorantur, consul-

tissimis Pontificum & Imperatorum decretis abrogari diuina & humana iura testantur. Extat super ea re Imperatoris Constantini edictum, quod Gregorius Papa Lateranensi concilio his uerbis promulgauit, ut si quis in stadio saucius animam efflaret, quauis pœnitentiæ locum relinqueret, solenni sepultura interdiceret. Quocirca quinquennialium Græciæ ludorum, & gladiatoria Romanorum palmæ nomina iam dudū obsoleuerūt, nisi quòd adhuc in Italia, quia domicilij ueteris imaginem quàm proximè studet æmulari, milites cū tauris & syluestribus feris interdū ad proluisionem committuntur. Nos uerò longè, mea quidem sententia, prudentius hominum & belluarum coniunctionem reieci-mus, ne impium foret ut ea inter se à nobis copularentur, quæ præpotētis Dei æterna prouidentia remotissimis interuallis dire-misset. Quid ergo? Nos cæteras reip. ad-ministrandæ leges à ueteribus depromptas habemus, hanc de adolescentum gymnasiis, omniū Solonis maximè necessariam interire patiamur? Nō est ita, Aud. grau. quod etsi priscarum exercitationum forma temporis longinquitate oblitterata sit, nihilominus

hilominus exemplum ufusque retinetur,
& nihilo feignius apud Gallos, quàm apud
Græcos iuuentus ad arma & laborem pro-
mouetur. Nam ut adolefcentes de plebe;
& illorum confuetudinem prætermittam,
an eft ulla dimicationis ratio, in qua nõ ij
ftrenuè torqueantur nobiles liberi, qui apud
Regem & Principes educantur? Qui fimul
ac per ætatẽ onus ferre poffunt, ad luctadũ,
curfitandũ, uenandũ, faltandũ, digladian-
dũ, equos domandos, arma tractanda, &
ad omnes pugnarũ euentus aptiffimè eru-
diuntur. Quin etiam fi quando à bello ua-
care, feputis Regum diffidiis, contingat,
ne feriando cuiusquam nerui elanguefcant,
confestim carceres eriguntur, in quibus &
ad uirium oftentationem, & ad illuftrium
uirginum demerendam gratiam non mi-
nus animosè concertant, quàm fi odio sti-
mulati cum hoſte in aciem, rerũque ac
capitis difcrimen descendant. Quanquam
ea metarum lex eft, & feueriffimè descri-
pta conditio, ut ab equitibus manum cõ-
ferturis fimultatum aculei deponantur, ut
uindiætæ cupiditas exuatur, ac fi quid al-
terutri ex duello aduerfi euenerit, alteri fi-
ne offenfione remittatur. Atque hæc funt

usitata nostris Principibus præludia , non ualde ab Atheniensium spatiis & quintio aliena, certè ad robur , & ad ualitudinem etiam aliquanto commodiõra. Supereſt pila trigonâlis , de qua nonnihil ſubiicere meditabar , quoniam à Galeno quamplurima, quæ in dies experimur, de illius uſu enarrantur : ſed ad ea mihi ſentio eſſe properandum, quæ de ingenij curriculis me ſecũdo loco complexurum pollicebar . Enimuero , Aud. grau. hæc ut ego ſpiritu quamliberrimo agere , & uos ſine ſatietate attendere poſſitis , neceſſe eſt mihi aliquam quieſcendi poteſtatem tribuatis, ſimulque uobis ipſiſtædii reficiendi ſpatium tempùſque aſſumatis . Cæterum orationi meæ , quoad licebit , in poſterum moderabor, & quæ de animi commentationibus perſequi uerbis ampliffimis comparabam, paucis perſtringam , ac in laconiſmum contraham , ut quamprimùm (quod permulti ueſtrùm deſiderât) octodecim Iatrogoniſtas in puluerem emittamus , in eorùmque perſonis & maiorum ſapientiam, & noſtrorũ hominum induſtriam cum admiratione contemplemur. Non ſine cauſa priſci Athenienſium

& Romanorum populi tam sedulam in corpore constituendo diligentiam adhibebant, siquidem diuinus Plato rectè $\sigma\omega\mu\alpha$, quasi $\psi\upsilon\chi\eta\varsigma\sigma\eta\mu\alpha$, tumultum animi, & receptaculum interpretetur: ac in eo multa latere, quæ acuant mentem, multa quæ obtundant Medici Galeno sibi auctore suspicentur. Sed tamen cauendum est ne tantoperè domicilio seruiamus, ut domini, hoc est animi, curam deferamus: quam in partem grauissimè peccant, qui plus æquo in cute saginanda occupati, & genio indulgentes corpus magnificè uestiunt, molliter nutriunt, ab iniuria tegunt & cōseruant, interim de animi pabulo nihilo plus anxij, quàm si se totos ex carne & ossibus compactos, & ad mortalitatem natos, brutisque non absimiles arbitrarentur. Contrà cùm duas in nobis naturas, terrenam unam, cælestem alteram agnoscamus, neutri propemodum addicti obsequamur, uerùm tempus & facultates ita partiamur, ut utrique, quantùm exigit, necessaria æquabiliter prouideamus. Corpora contentiones moderatas requirunt, nimia defatigatione ingrauescunt: animi autē quò sæpius mouentur, eò magis nitēr

atq; reficiuntur. Nunc ergo, Audito. grauiter
repetamus ætatis illius memoriam, cum
primum disciplinæ ex lethæa obliuione,
profundissimisque barbariæ sepulchris in
lucem excitæ feruntur. Quo tandem modo
maiores nostri rem tantam & tam arduam
perficere, aut qua ratione posteris
ad discendum uiam tot seculis interclusam,
tot mæandris intricatam aperire potuerunt?
Postquam igitur artibus inueniendis
obseruatio dedisset initium, nihil non
limatum & absolutum consequuta exercitatio
dicitur peperisse, quando in singulis
rebus quid optimum esset, quid contrarium,
quid salutare, quid inimicum frequens
usus, multaque consideratio distinxisset.
Ita, quantum augurari licet, quondam
homines cōgregati in publicum coibant,
& de iis, quæ tum occasio, necessitasque
offerebant, inuicem colloquentes ex
uariis controuersis in eam demum sententiam
recidebant, quæ sapientum iudicio
probaretur. Quibus principiis altius
prouecta scientiæ cupiditas, rerum plurimarum
obscuras, nec satis compertas intelligentias
enodauit, cum ad ueritatis disquisitionem
coniuncta solertiæ ac laboris æmulatio

æmulatio accessisset. Erāt tunc Græci præter cæteras gentes cognitionis ardore inflammati, & insuper otio abundantes, & ad percontandum laboriosi, & ad inuestigandum prompti atque perspicaces. Ex quo breui tempore tam multiplici doctrina præstiterunt, vt Appollinem & Mineruam cum uniuerso Musarum & Charitum choro cælitus recepisse viderentur. Socrates enim continuò philosophiam in domos introduxit, à quo infiniti auditorum greges profecti, quòd ex eius uariis, & in omnem partem diffusis disputationibus, alij aliud apprehendissent, dissidentes inter se multùmque diuisas opiniones profeminarunt. Cùmque nemo non esset, qui non modò sententiam suam arctissimè tutaretur, uerumetiam publicè palàmque proclamaret, diuersæ philosophantium sectæ profluxerunt, quod alij Academicorum nomen uenarentur, alij Peripateticorum familiæ adscriberentur, nonnulli Epicureorum lautitias amplexarentur, plures pro Stoicorum austeritate propugnarent. Inde Aristotelis Lycium, Platonis Academia, Zenonis porticus, Epicuri hortuli, quatuor principes doctorū
offi-

officinæ extiterunt, in quibus adoleſcētum ingenia tantum discrepando meditandō-que acuebantur, quantum palæſtritarum corpora quatuor ludorum frequentatione caleſcebant. Atque ut athletarum, ſic philoſophorū gloria ab humili ad ſummum perducta, & Athenæ non minus horum, quàm illorum celebritate inſignes claræq; floruerunt, donec Romani peregrinæ nobilitatis inuidi ſeſe ab armis ad quietem toto conatu retulerunt, & hāc quoq; Græcorum laudem, ſicut reliquas omnes, in ſuā urbem inuexerunt. Quod quidē cō facilius cōſequi potuerunt, quō Athenis ſtudia doctrinæ, quæ antea eruditiffimorum diſſenſionib⁹ uiguerāt, languidius, negligen-
tentiūſq; tractabantur. Quis enim dubitet Mineruā ciuitati ſuæ inſenſam nō idcirco in Latium cōmigrāſſe, eāſq; ſedes appeti-
uiſſe, ubi homines deſiderio diſcendi tene-
rentur? Sed quorſum hæc diſputo? quorſum? Ut intelligatis, Aud. grau. his in
terris Muſas humaniores reſediſſe, in qui-
bus exercitatio ſtudiūq; impenſius coleba-
tur: ab illis profugiſſe, ubi animorū diſce-
ptationes frigere, & ad nihilum breui re-
lapſuræ uidebantur. Itaq; apud Romanos
tandiu

tandiu scientiarū decus dignitasq; permā-
 sit, quandiu per seculorū calamitatē, infe-
 stāmq; posterorū crudelitatem saluæ leges
 armāq; ualuerunt. At uerò nouissimis im-
 perij tēporibus, cū potentia Italici nōmi-
 nis simul & ciuiū industrię artēsq; inclina-
 runt: siue in omnibus rebus id uicissitudo
 ferat, quod de Athletis scribit Hippocra-
 tes, ὅτι ἐκ ἐπιδυνάμειται ὡς δ' ἐβέλπτον, λείπειται
 ὡς δ' ἡ χεῖρον: siue q; Gothi & Vandali, po-
 puli post orbē conditū perditissimi, cuncta
 Italiæ tabularia, quæ plena erant librorum
 & bonarū literarum, funditus incēdio de-
 leuerūt. Ex quo barbaries latiūs dissipata,
 maiorum mentes per multos annos uelo
 ignorance occæcauit, donec Christus
 humanę cecitatis misertus, quosdā de Grę-
 corū reliquiis suscitauit, quorū auxiliis di-
 sciplinæ à Gothico naufragio enatarunt,
 sensimq; iucundissimū terris fulgorem o-
 stenderūt. Quod quēadmodum acciderit,
 quī etiā Academia, quæ Athenis primū
 Romęq; fuerat, ea deinde in Galliā transla-
 ta sit, sigillatim exponerē, nī me iandudū
 uestre aures audiendo defesse ad alium ser-
 monem inuitarēt. Dicerem, Aud. grauiss.
 ut suafore Alcuino, Rabano & Albino ad-
 iutoribus

iutoribus, Carolus ille magnus tria publica gymnasia, Bononiæ, Papiæ, Lutetiæ fundauerit: ut in Græcia scholarū loco cœnobia extruxerit: ut postea eius uirtutē alij Reges insequuti Parisiensem Academiā maximis beneficiis & priuilegiis cūmularint: ut denique Franciscus Valesius scientiarū parens & alumnus extiterit, ut libris ubique conquisitis, & doctoribus ex tota Europa conductis, altissimo Musas fastigio collocarit. Dicerem inquam, Auditores, quis status Academiæ, quæ regula gymnasiarū, quæ facultas professorū, quæ audientiū docilitas, cuncta deniq; locorum insignia denotarē. Quid est enim perinde hoc conuētu silentioq; dignum, q̃ ut mecū res Francicorum Regum præclarè gestas recolatis, quorū institutis ex immani agrestiq; feritate ad humanitatem māsuefacti atq; mitigati fuistis? Hęc uerò ut omittam, & in uestris iudiciis mentibúsq; relinquam, nō est tamē prætereundū, ut in hoc pariter exercitationis genere nostri homines cū ueterū moribus mirificè cōsenferint. Considerate igitur, & id quod leuius cogor percurrere, intimis cogitationibus uobiscum reputate, profectò uos cū antiquis nescio qua similitudinis

rudinis affinitate copulatos esse suspicietis. Athenienses ad corporis temperationem quatuor stadiorū ludos aperuerunt : iidem ad ingenij curricula quatuor philosophorum sectas adiunxerunt , illud fortasse attendentes quòd corpora quatuor elementis & qualitatibus cōstarent : animi quatuor uirtutibus dotibúsque reniterent. Nos autem parū ab illis in ista gymnasiorū descriptione discordantes, Academiam quatuor ordinibus, Præceptorum, Medicorū, Iuris Pōtificij consultorum, Theologorū : quatuor scholis, Frācorum, Picardorum, Germanorum, Normanorum cōstitutam & ordinatam tenemus : cuius insuper quatuor descriptores ab illo imperatore Carolo delecti in Annalibus numerantur. Quæ cū attentè accuratèque perpendo , nunc demū credere incipio quod uix mihi antea persuadebam , non temerè quadratam figuram & numerū à Mathematicis , quadratum corpus à Medicis, quadratam personam à vulgo, quadratum deum à Poëtis, quadratam ab Oratoribus dictionem crebro sermone usurpari. Inest enim tetragono ea præstantia , ut quancūque in partem uoluatur, ubique sui similis subsistat : unde
certo

certo consilio quæcunque in natura excellūt, Deus per quatuor designari, quin & se ipsum quatuor literis apud omnes nationes enunciari uoluerit. Quapropter, Auditores grauis. nunquam me istius quatuor mensium operæ pœnitebit, nunquam ego uanas lucubrationes appellabo, quæ in Iatriorum & Iatrogonistarum dimetiēdis spatiis mihi hætenus effluxerunt. Nam si Homerum minimè tædebat in Vlyssis erroribus totam ætatem contriuisse, si minimè Virgilium Aeneæ profectioes decennium perlustrasse, si denique omnis scriptorum industria in paucorum commendatione posita est, quid me puderet in octodecim quadratorum virorū præconio uersatum, priuata studia breue ad quoddā tempus intermisisse? Fuerint hæc ueterum miracula ut Aeneas armis Italiam penetrarit, Vlysses disiunctos Oceani sinustraiecerit, Hercules duodecim monstra subegerit: fuerint, inquam, hæ illorum laudes quòd uitam in labore, ocium in honore traduxerint: Hiero, Theron, Agesilaus, Diagoras, aliique quadrigarū uictores à Pindaro decantētur: Socrate, Platone, Aristotele, Zenone, nobilissimis philosophiæ coryphæis

Gracia

Græcia quantumlibet insolescat. Nunquā
meherculè conuictus adducar, ut non istos
Iatrogonistas antiquorum principibus &
acumine ingeniorum, & utilitate studio-
rum, & magnitudine officiorum antepo-
nam. Hîc sunt qui Platonis diuinitatem,
Aristotelis flumen aureum, reliquorū con-
tentiones non solum adæquarunt imitan-
do, sed etiam uicerunt sustinendo. Vidistis
Auditores grauis. per hosce annos Iatro-
gonistarum dimicationes, non quinq; die-
rum, quales Græcorum pugilum: non sub
umbra & porticu, quales philosophorum
fuerunt: sed in oculis uestris unius biennij
ardentissimas dissensiones uidistis. Quā
sæpè illos in hoc Iatrico stadio vultu cun-
ctisque artubus desudantes, ueteranorum
imperatorum telis appetitos, propriis sese
uicissim armis laceffentes, omnium hastis
oppressos, fortissimè tamē clypeis obsisten-
tes spectando dubitastis, utrum illorū for-
tunam potius miserari, an uirtutem admi-
rari deberetis? Quā sæpè illos honesto
pulvere sordidos, gradu gestuque langui-
dos, prælij diuturnitate confectos, lætitia
nihilominus exultantes, & magnitudinis
suæ consciētiā triumphātes uestro applau-
su de-

fu decorastis? Equidem cùm frequēs hisce spectaculis interessẽm , & astātium rumulos interdum subauscultarem , memini tantoperè istos prædicari , ut omnis memoriæ, omnium gentium, omniũ seculorum clarissimi palæstritæ confirmarentur. Quamobrem cùm Iatrodicæ , qui magno numero his in subselliis assidēt, suos Athletas satis supérque tentatos, & uirorum grauißimorum iudicio abundè probatos esse comperissent, ut iam uindicarentur , ac in magistrorum honorarium ordinem transferrent, ab Agonotheta uno uniuersi ore flagitarũt. At ille , ut æquissimus semper fuit laborum iudex & æstimator, statim decreuit , ut per me octodecim Iatrogonistæ ad certum locum diẽmque congregati præteritæ altercationis immunitatẽ præmiũq; reposcerent. Ego itaque , Aud. grauiss. ne creditam prouinciam deseruisse , ne cuiusquam authoritatem illusisse , ne uestræ uolūtati uidear defuisse, Iatrogonistas singulatim nominabo , & cùm primũ animam uirẽsque collegero, complectar breui quid in unoquoq; eximiũ sit , quamobrem publica laurea, totius integerrimi conuentus approbatione donari mereatur.

O R A -

ORATIO SECVNDA.

Tsi nemo ferè non ad otium & quietem omnes cogitationes intēdit, mihi tamen perbeati fuisse videntur, Aud. grau. qui ab incunte adolescētia genus uiuendi laboriosum sortientes, in eo sustinendo & prudentiæ suæ robur ostentare, & animi constantiam retinere potuerunt. Etenim nihil est in natura, eorū quæ singularis beneficij loco expetuntur, quod aut generis nobilitate, aut fortunæ opulētia, aut corporis uenustate adipisci soleamus: verū ut paupertati & diuitiis æqualiter ad honores uia pateret, Deus cūm præclara omnia nobis uenalia exponeret, solum laborē coēmendæ possessioni pretium assignauit. Ita fit ut nisi connitatur, frustrā quisquam ad ullum excelsæ laudis uerticem putet ascendere: at qui rationes, quæ aliquò ducunt, diligentissimè inuestigat, tandem eò se peruenturum confidat, & postquam radices amarissimas gustarit, fructus dulcissimos percepturum. Vlysses multis magnisque regionibus uagatus, pa-

C triam

triam & vxorē recuperauit: Aeneas, terra marique uexatus, Italiam occupauit: Argonautæ fluctuum & uentorum procellis conflictati, ad littus aurei uelleris compotes applicauerunt: Athletæ decurfis palæstræ spatiis palmam uictores retulerunt: denique nullus unquam intentius aspirauit, quem non postremò fœlices successus incredibili lætitiæ uoluptate recrearint.

Quamobrem Iatrogenistis omnibus (iam enim ad illos mea pertinet oratio, ut à quibus perorandi occasionem, ab iisdem etiam agendi exordium nanciscatur) imprimis gratulor, lætórque quòd maximis suis periculis & laboribus defuncti, eum doctrinæ scopum attigerunt, in quo amplissimam famam cum placidissima tranquillitate cōiunctam reperisse uideantur. Nam si quis est, Aud. grau. qui minorem laudem existimet Medicos nominari, quàm aut Athenis Olympionicen fuisse, aut Romæ triūphantē, uehementer errat, proptereà quòd illorum gloria ex incerto plebis applausu nascebatur, & cum eo quàm citissimè euanescebat: isti autem firmissima grauißimorum uirorum approbatione decorati, sibi prætercà honorificam, & quamplurimis

mis salutarem industriam artemque pepererunt. Etenim licet Medicina tunc cum adhuc eius vis ignorabatur, & liberales disciplinæ barbaris populis sordescabant, ubique terrarum exagitata, uix ubi confisteret sedem obtinere potuerit, nullam tamen esse opinor scientiam, aut uberius hoc tempore tractatam & limatam, aut in discendo iucundiores, aut in facitendo magis exigenti fructuosam, minúsque auctori periculofam. Idque ut aperte manifesteque cognoscatis, longius paulò ab eius antiqua origine ac inuentoribus principiū rei demonstrandæ accersam: quod quæso, Aud. grau. ne molestè patiamini: principiis enim cognitis multò facilius extrema intelligetis. At enim ego illud conficiam, & prima incunabula Medicinæ indicabo, quæ priscos homines istarum rerum perspicacissimos indagatores latuerunt? Nam ut omnes ueteris memoriæ scriptores istius disciplinæ inuentionē Diis immortalibus uno consensu ascribant, nihilominus de certi parētis nomine dissident inter se atque discordant. Aegyptij olim artificio & ingenio principes, Mercurium apud se remedia ægritudinis excogitasse profitentur.

Vrgēt contrā Babylonij & Arabem suum Aegyptiis opponunt, ab eoque non solum sciētiae indicium, uerumetiam perfectiōnem usumq; prodiisse, ac in omnium orbem terrarū exiisse affirmant. Græci uerò cum utrisque interdicto certant, & Athenas artium optimarum procreatrices nuncupari, ob idq; Apollinem, Chironem, ac Homericos heroas Podalyrium & Machaonem curandi opifices atque magistros extitisse iusto sacramēto cōtendunt. Quæ tota controuersia inde potissimùm serpsit, quòd cū illi de gloria inuicem disceptarent, suam gentē ut imperij amplitudine, sic literarum & studiorum elegantia superiorem existimari uolebant: neque idcirco de artibus tantum, sed pariter de scriptoribus magnoperè discrepabant, quandoquidem eorum, qui aliqua laude illustres fuissent, ortum nomēque sibi certatim vendicabant. Legimus Homerum, quia Poëta disertissimus fuisset, à quatuor ciuitatibus post mortem adoptatum, & tam mirificè quòdam expetitum, ut Colophonij ciuem esse suum assererent, Chij refragarentur, Salaminij reposcerent, Smyrnei cultu sanctissimo uenerarētur. Ego autem
de

de Medicina diu multumque percontatus animo cruciabar, fanéque metuebam ne id stultū haberetur, quòd de artis initio hæsitarem, de qua sentētiā ex professo explicare suscepissem. Quocirca satius esse duxi ut omisissis altercationibus, quæ plus acutæ subtilitatis, quàm solidæ frugis contineant, Medicinæ inuentum diuino beneficio tribuerem, incrementum & absolutiōnem maiorum solertiæ studiisq̃ concederem. Sic enim se res habet, Aud. grau. Deum baccas, herbas, ac plantas humo excitasse, iisq̃ aduersus morbos vires propitias indidisse, quarum præsidio mortaliū salus integra cōseruaretur. Græci ea seminaria primū dicuntur obseruasse, detexisse, subegisse, atque ad extremam maturitatem prouexisse. Etenim antequam ulla Medicorum mentio in cæteris prouinciis audiretur, Aesculapius totam illam rationem, quæ sub Apolline nata credebatur, paululūm erexit, & in Græciam ingenti ciuiū admiratione introduxit: Cuius duo filij Podalyrius & Machaon sub Agamnone Troiano bello merētes nō mediocre suis cōmilitonibus solatiū attulerunt. Atque ista quidem Medicinæ fundamenta

summam memorantur, quæ deinceps
Asclepiadæ longo interuallo neglecta &
labentia restituerunt. Interim uarias mi-
serâsque uices Medicina tolerauit, & par-
tim belluina populorum immanitate, par-
tim factitantium perniciofa ignoratione
circûscripta, falsis calûniis laborauit, quo-
usque Hippocratis patrocini tam officio-
sè defensa est, ut denuò suæ integritati fi-
dem fecerit, & prius amissam ciuitatis ac
libertatis usuram impetrarit. Nam etsi an-
te Hippocratem quorûdam Medicinæ ar-
tificum antiquitas meminisset, nōdum ta-
men certis disciplinæ legibus cōstabat, non
ex theorematibus & præceptionibus, tum ue-
ris, tum utilibus, tum mutuo inter se con-
nexu hærentibus erat constituta, sed rudia
quædam & confusa eius rudimēta in tem-
plo Dianæ insculpta Ephesi uisebantur,
quæ uerius ἀρχαίαι, quàm ullum scientiæ
uestigium redolebant. Verùm Hippocra-
tes ubi totum adolescētiae curriculū Athe-
nis exegisset, deinde multam experiētiam
ex assidua inquisitione, frequēti animad-
uersione, seriisq; doctorum colloquiis re-
portasset, demùm ætate confirmata cū
animum

animum ad scribendum appulisset , sparsa colligens, obscura illuminans, nōnulla ex Philosophorum libris assumēs, cuncta suo ingenio iudicióq; distinguens, artem medicam luculenter definiuit. Cui postea sexcentis elapsis annis Galenus succedens confita ab eo semina gnauiter excoluit , quæ Diocles, Praxagoras , Chrysippus, Erasistratus, Creon, Agrigentinus mutuis antea dissidiis infecerant. Cū uerò propter concisam sermonis breuitatem multis nodis quædam documenta Hippocrates intexisset, alia non satis enucleasset, dilucida Galenus enarratione dilatauit , inchoata amplificauit, mutila suppleuit, separata colligauit, denique medicam scientiam, qualem nunc tenemus, numeris omnibus absoluit. Habetis igitur, Aud. grau. artem maximam, à Deo tributam , ab Apolline & Aesculapio indicatam , ab Hippocrate collectam, à Galeno illustratam, à nostris autem Iatrogenistis sic copiosè intellectā, ut certissima mihi spes oblata sit, eos propediem splendidissimo eruditionis suæ fulgore veteribus tenebras iniecturos, uobisq; & uestre uitæ auspicatissima posthac adiumenta præstituros. At dum ista proximi

sermonis fundamenta pono , ecce repentinis Pausanię, Catonis, & aliorum *μισαθῶν* rumusculis inceptor, qui obstrepunt & obganniunt auribus meis, Medicinam olim explosam, profugam, & ueneficii ab antiquis condemnatam . Quibus figmētis etsi res ipsa occurrit, & obtrectantium peruersitatem causę bonitas euertit, paucis tamen arbitror respondendum, ut omni criminis suspicione liberata , uestrisque equissimis iudiciis absoluta saluam libertatem, ac sartam tectam innocentiam tueatur . Habebūt igitur accusatores quod est unicè huic hominum generi optandum, confitentem reum; sed ita confitentem, Medicinam in eo periculo fuisse, in quo Eloquentiam, in quo Iurisprudentiam, in quo cunctas humaniores disciplinas . Quare prius de toto artium circulo loquātur necesse est, quàm istius ullam culpam aut factum reprehendant . Nam si uniuscuiusque rei præstantiam non ex ueritate, sed ex opinione ac sensu metiātur, quod ridiculum Epicuri dogma fuit, quid erit, cedo, in uniuersa natura, quod ubique laudetur, quod omnium armis auxiliisque protegatur ? Nihil est tam honestum, quod non iniquitas oppugnet:

nihil

nihil tam inuiolatum, quod non malitia corrumpat: nihil tam religiosum, quod nō inuidia impietasque labefactet. Quid? Romani sub Consulibus Medicos, sub Tito Imperatore Oratores & Iurisconsultos expulerunt: Lacedæmonij Musis & Poëtis bellum facēsque indixerunt: Gothi & Vandali ne unam quidem literam in Italia superare uoluerūt: nos Christianissimis moribus legibusque imbuti, obsoletam indignissimæ atrocitatis imaginē reuocemus? Porro quænam ratio fuit cur Apollo in Deorum numero colebatur, eique animæ in cælum remeantes pæana canere fingeantur: Aesculapio gallus ales dici nuncius cōsecrabatur: Hippocrates immortalib⁹ Herculis honoribus afficiebatur: ab illis autem profecti discipuli Græcia excedere senatusconsulto iuebantur? Quare Medicinæ præcepta uerè dici non possunt, si quæ insciji imperitique pro salutaribus mortifera cōscripserint, nec si pharmacis quidam ad aliorum perniciem abutuntur, totam continuò culpari oportet societatem. Quotidiè Nautarum negligentia classes demerguntur, Imperatorum ignauia vrbes amittuntur, Patronorum inscitia res & fortunæ litigantium

tigantium periclitantur, intestinis insidiis Christianæ pietatis præsidia opprimuntur: ergo nauigandi commoditatem improbemus, militandi necessitatem repudiemus, iustitiæ uinculum dissoluamus, & illam animorum moderatricem, fidei custodiam religionem abiecta & fracta mente perfidi deferamus. Quocirca si res ipsas ex se, ac ex supremo Dei beneficio, nõ ex fallaci hominum estimatione spectari necesse sit, desinant tandem sceleratissimi calumniatorum greges cõtumeliis Medicinam aspergere, præsertim cùm nulla hodie sciëntia aut discenti delectationem & gratiam, aut populo utilitatem maiorem conciliare uideatur. Quæ duo, quemadmodum antè institueram, reliqua oratione docebo, si mihi à uobis, uti spero, eam quam soletis patientiam & benignitatem tribui concediq; sensero. Cùm igitur ita ferè uita mortalium cõparata sit, ut (id quod est apud Aristotelem) πάντες ἀνθρώποι τὸ εἶδέναι ὀρέγονται φύσει, profectò & ad eam cognitionē præcipuè incēdimur, ex qua delectationis suauitas non minus quàm commoditatis fructus ostenditur. Quòd si nulla exquisitior & solidior uoluptas esse possit, quàm quæ

ex honestissimis scientiis percipitur , de Medicina dubitare nō conuenit , quin mirificas studiosorum hominum ingeniis verneret suppeditet , neq; unquam acrioribus molestiis illorum aciem obtūdi corrodiue patiatur. Nihil est in animo , nihil item in corpore , nihil denique in omnibus , quę ad corporis & animi curam pertinet , disciplinis , unde Medico usus & iucūditas nō accedat , ut quod ab Homero scriptum legimus , ἡντὸς γὰρ ἀνὴρ πολλῶν ἀνταξίος ἄλλων , id ita uideatur interpretādum : Medicum cæteris artificibus nō modò dignitate præponēdum , uerumetiam omni deliciarum genere superiorem . Est enim Medicina nō sicut alię artes , exiguis limitibus & terminis conclusa , sed ex cunctarum uniuersa complexione coaceruata : ex quo cū singularum rerum difficultatem suo ambitu constringat , æquum est eam infinita uoluptate refertam abundare , ne discētium studia contentione infringātur , potiúsque magnitudinem scientię amplissimo gratię & honoris inuitamento illecti amplexentur . Sensus , qui à Philosophis interpretes ac nuncij rerum constituuntur , in plerisque aut inanes & reusi apparent , aut ad libidi-

nes

nes & fœdissima quęq; facinora conferuntur. At quàm illorum accurata & perfecta in Medicis censura cernitur, qui auditu artem concipiunt, reliquis sensibus usum & actionem exercent? Quàm enim illis immensum ac iucundũ est, ut oculorum perspicacitate qualissimam sit cuiusque uultus, sanó ne similis an dissimilis, primo statim cõspectu pręfagiant? ut ex odore uitiatane sit corporis temperies, an inculcata augurentur? Ex gustatu quænam sint alimenta & medicamenta benigna & familiaria, quę uerò nociua & pestifera discernant? Ex tactu, abstrusa pulsuum discrimina, caloris, frigoris, & aliarũ qualitatum diuersas uires & recessus, tum etiam ægrotantium inconstātes habitudines animaduertāt? Prætereà ut apes ex dispersis hîc atque illîc flosculis fauos ad mellificium delibāt: eodem modo Medici ex summis quibusque artibus gemmas seligunt, & in cumulum conglobatas ad suam rem, & ad humanę societatis necessitatem depromunt. Nam & Arithmetica illi ad criticas initij, status, & declinationis morborum rationes utūtur: & ex Geometria de apta & cõcinna membrorum collocazione, decentique figura

&

& æquabili proportionē decernunt : & ex
 Astronomia stellarum motus & cōcursus,
 æris mutationes, Lunę incremēta & decre-
 menta , cælestium astrorum ortus & occa-
 sus obseruant , pro quorum affectionibus
 inferiora animātium corpora gubernātur.
 Quid autem Philosophia ? Nōne & eius
 unguentis Medici quoq; nostri perfundū-
 tur ? Etenim cū tripartitō ipsa distribua-
 tur , à prima parte compendiarīam naturę
 morborum & sãnitatis inuestigandę me-
 thodum : Ab altera elementorum & qua-
 litatum permixtiones , mutationum ui-
 cissitudines, & innumerabilia huiusmodi
 hauserunt : A tertia ægrotantium pertur-
 bationes regere , affectus sedare , iram &
 dolores mitigare didicerunt. Omitto uni-
 uersam herbarum rationem , quę quanta
 sit , quāmq; delectabilis , nullus , opinor,
 inficias ibit, qui admirandas earū proprie-
 tates mediocriter notauerit. Venio nūc ad
 illam, quę Medico peculiaris conceditur,
 corporis humani fabricam, in qua cū sic
 attentē exahtëq; uersetur, ut intus & in cute
 seipsum & ceteros speculetur, exprimi me-
 herclē non potest quanto gaudio perfrua-
 tur, quātūmq; pręstantia cognitionis, atq;
 uolu-

uoluptate cūctos antecedit . Publius Africanus fingitur apud Ciceronem cum Scipione patrūo cælū, terras, maria, reliquāq; , unde generata, quò reditura, quando, quomodo peritura, quid in iis mortale & caducum, quid diuinum æternūmq; fuisset, per insomnium perlustrasse . At reuera mihi uidetur Medicus ipsum ea moderantem & regentē Deum manu penè captasse, adhæc Naturæ à cōsiliis & arcanis extitisse , cū artificiosam corporis uniuersi structuram machinaretur . Nulla sunt enim propemodum in hominibus organa, quorū appellationes & munera non perspexerit, unde ducantur, quò ferantur, quomodo cōnectantur, quibus subsidiis usibúsq; applicentur . Quòd si Poëta iure illum foelicē exclamet, qui latentes in rerum causas penetrare potuit, ô terq; quaterq; beatum Medicū , cui nihil obscurum , nihil reconditum , nihil omnino abstrusum, quod non intimo artis & mentis acumine indagarit . Vulgus hāc molem temerè, tanquā ex Promethei luto cēsebit esse cōflatam . Quid uerò Medicus? Certis mēbris, debita serie positis distinctā, & ista cōditione, ut lucē cibo, potione spiritu carperemus, effictā, in eaq; ingeniū, sicut simula-

simulachrū aliquod dedicatū respondebit. Interrogetur de populo quispiā quī nutritio fiat, & ex nutritione incrementū & magnitudo staturæ cōsequatur. obmutescet. At Medicus sciēter disputabit datos idcirco dentes tū aduersos, tum genuinos, ut in os iniectam escā extenuent, quā deinde agitatione linguæ depulsam stomachus admittat, cui subiecta & inhærēs alius omne quod accepit, siue aridū, siue humidum calore natiuo, quo multū ualet, cōcoquat & cōfundat: demū per quasdā à medio intestino usq; ad portas iecoris directas uias, atq; inde per uenam cauā ad cor eū succū, quo nutrimur, iam coactū cōfectumq; detrudat: qui deinceps à corde per uenas admodum multas in omnes totius corporis latebras & mēbra dispertiatur. Audiamus eundē de spiritu differētē, ut aspera arteria linguę radicibus annexa quasi operculo tegatur, ne si quid in eā cibi fortē inciderit, spiritus impediatur: ut anima in pulmones liberē peruadat, ut insita quadā in pulmonibus raritate, & assimili spōgiis mollitudine cordis æstus spirādo & expirādo refrigeretur. Longum esset, Aud. grauiss. reliqua corporis adminicula enumerādo persequi,

sequi, quorum leuissimum maximas ad agēdū opportunitates habilitatēsq; uidetur obtinere . Natura oculos mēbranis tenuissimis uestiuit, & palpebris, ut muro interiecto circumsēpsit, ut si quid impēderet prōptius declinarēt: celsos autē & sublimes fecit, ut in cālū intuentes suæ cognationis & hæreditatis domiciliū recordarentur. Quā uerò conueniētes, quamq; multarū artium ministras manus impertiuit, facili porrectione & cōtractione digitorū, ad pingendum, ad fingendū, ad sculpendū, ad cultus agrorū, extrucciones tectorū, confectioes nauigiorū, tegumēta corporū, æris & ferri fabricā, cunctaq; & ad usum necessaria, & ad ornatū decora humanæ uitæ instrumēta? Quæ quidē quantū negotij & operę facessunt, quò plenē planēque intelligantur, tantū iucunditatis semel explorata, perspectaq; gignūt: adeò ut uerè Pulchra quę difficilia, ueteri Græcorū prouerbio celebrentur. Quapropter si ex Medicina oblectatio sola peteretur, nihilominus hāc animi remissionē humanissimā ac liberalissimā iudicaretis. Enimuero præter dulcedinē infinita ex his studiis emolumēta importātur. Ita fit ut eā scientiā exoptare, quòd discēdi sitim

fitim expleat, soleamus: cōplecti autē uel i-
deo debeamus, quia nō minus quàm aqua
& ignis in corū, sine quibus salui esse non
possumus, numero commodorum repo-
nenda sit. Inspicite igitur, Aud. grau. Me-
dicinæ utilitatē (dicam enim de ea postre-
mò, quoniam beneuolè attenditis) & id
quod breuiter loquar altissimis uestris mē-
tibus commendate. Nunquam sanè Me-
trodôrum philosophum contemnendum
existimabo, quòd uitæ humanæ beatitudi-
nem in firma ualetudinis constitutione,
eiusque constitutionis spe explorata puta-
rit consistere. Quid est siquidem homini,
quandiu his uinculis, & hac lucis calami-
tate coërcetur, tantoperè desiderandum,
quàm perpetua sine offensione ualetudo?
Nam dum nobis adest, facit ut opibus, fa-
milia, literis dulcissimè oblectemur: si ef-
fugerit, omnia molesto vultu & nauscan-
ti pectore, quanuis charissima respuamus.
Quare si baiulos, fabros, architectos, suto-
res, fartores quotidiana mercede donan-
dos sentiamus, quorum industriæ absque
usu sanitatis inertis desidia contabescunt:
quo tandem loco Medicos ducemus? quo
beneficio deuinciemus? qua beneuolentia

complectemur? quibus præmiis prosequemur? Illi ad uictum cōmoditates instruūt, hi salutis adiumenta ministrant: illi utilia, hi necessaria suggerunt: illi externa curāt, hi propiūs internorum satagunt: denique illi, ne uitæ opportunitates desint, inuigilant, hi ut continenti tēperatione fruamur, & viribus ad stabilitatem coagmentatis, & lacertis ad motum atque ad actionem expeditis. Fieri potest ut opere fabrefacto, & quamplurimis artificiis facilè careamus. Eleus Hippias cū Olympiam uenisset, confertissimo Graciæ conuentu gloriatus fertur, nullū esse non modò artis ingenuæ præceptum, quod ipse nesciret, sed annulum, quem gestaret, pallium, quo amictus, foccos, quibus indutus esset, se sua manu confecisse. At quotus quisque se ita neruis & artubus affectum uenditabit, ut Medici opem nullo tempore implorarit? Romani doctrine istius osores, Aesculapij serpētem Epeiro ad sæuientis pestilentiae perfugium accersuerunt. Græci tunc cū Imperio suo Medicos exterminabant, Hippocratis auxilium votis communibus poposcerunt, ut pariter ingrauescenti pestilentiae periculo eximerentur. Morbi non tantū priuatim

tim ex sanguinis corruptione, pituitæ affluentia & totius corporis conquassatione, sed etiam ex polluto, atque contaminato aëre palàm grassantur, quorum si lues cuitari non possit, de illorum necessitate fateamur, qui necessariis incommodis medentur, prosperam sanitatem instaurant, prostratæ & disiectæ opitulantur. Mirum est, Aud. grau. Christum mortali specie in terris degentem, nō Imperatoris, non Senatoris, sed unius Medici magnificum nomen assumpsisse, & hanc imprimis curandi rationem factitasse, suoque exemplo posteritati commendatam uoluisse. Quinetiā familiaris quōdam & usitata fuit Regibus medicina, ut de Sabor, Ginge, Sabelle, Mithridate, Hermete, Mesue, Aui-cenna historiæ testantur, qui omnes viri principes medicam scientiā præcipuo munere coluerunt. Insuper pleraque in hanc sententiā de salutari Medicorum potestate commemoranda supersunt: quæ quia in propatulo partim collocata, & in ore populi iactantur, partim etiam quia innumera-abilia prolixiori narratione indigēt, à me silētio tacitus inuoluūtur. Iam enim tempus est ut ad Iatrogonistas dirigatur oratio

mea, propterea quòd eorum causa fuit elaborata, neque penitus disciplinæ maiestatem & excellentiam, quàm ex illis cõtemplari ac internoscere ualeamus. Quemadmodum enim propter marmoreum Praxitelis Cupidinem, æreum Myronis Herculem, insignem Zeuxidis Helenã, Coam Apellis Venerem, signa & tabulæ plurimi antiquitùs æstimabãtur: ita Medicinæ claritas in istorum fulgidissimis ingeniis folle illustrius elucescit. Equidẽ dum in singulorũ virtutes respicio, magis atque magis eius virginis generosam pulchritudinẽ admiror, quæ tot tãmque præstantes procos ex disiunctis Academiæ ac literarum officinis congregatos in sui amorem gremiũque pellexerit. At uerò, Aud. grau. Deo immortaligratias immortales debetis, quòd in ista corporum imbecillitate, æuĩque inconstantia & breuitate, tot ἰατροὺς, & Asclepiadarum familiæ Antistites cælitùs uobis demiserit, qui uestrum caput ab omni piaculo contectum, & à circumstantibus iniuriis intactum defẽdant. Querimur maiorum nostrorum longam & fortunatam ætatem fuisse, nostros homines uix ad sexagesimum annum peruenire,

nire, atque hoc quātuluncunque spatium mille cladibus ac ærumnis interruptū esse, siue ob ingluuiem, siue ob ferculorū lauitias, & epularū condimenta, siue ob horribiles astrorum aspectus, ac corūdem ortus, eclipsium atque coitionum frequentatione deprauatos. Ego uerò mox uobis in mediū producam aliquot Apollinis filios, Chironis & Musarum alumnos, heroas orbi Gallico cōsecratos, qui assiduīs uigiiliis & indefatigata cōmentatione perfecērunt, ut publicis aliquando miseriis prouiderent, & languentibus ægrotantiū corporibus *ἰατρὸν καὶ φάρμακον*, & præsentiſsima medicamenta adhiberent. Hercules de apro, leone, hydra superbè triūphauit: Olympiorum cursores palmis nobilitati, pedum & equorum celeritate insolentius exultarunt: Nostri autem Iatrogonistę galea Medicinæ, uelut Vulcaniis telis fulti, aduersus intestinum Naturæ hostem audacter prorumpent, nulla non febrium & dolorum monstra debellabunt, tota deniq; Pandorę sentina Galliam inquinatam expiabunt. Pollent robore, fulgent consilio, cunctas obsidendi, vincendi, obsistendi vias & insidias callent, nulla unquam morborum

contumacia frangentur, nullo impetu cō-
 tundentur, nunquam de suo honore & ue-
 stro capite desperabunt. Quamobrē, Aud.
 grau. si Medicinæ facultas benigna & fru-
 ctuosa est, si constās corporis habitudo iu-
 cunda, uobis quoque in pretio illos esse cō-
 uenit, qui scientiæ mysteria consequuti,
 animo & armis perbellē instructi ex remo-
 tis Europæ regionib⁹ ad hoc pacis & quie-
 tis domicilium Lutetiam appulerunt, ut,
 quemadmodum mox ex illis cognoscetis,
 uestram uitam malorum & calamitatum
 machinis interceptam quibuscunque pos-
 sent præsidiis, in posterum duce Medici-
 na, Deoque foeliciter auspicante subleua-
 rent.

OR A-

ORATIO TERTIA.



Vm multa diuinitùs, Auditores grauiſs. à maiori-
bus noſtris ſapientiſſimis
viris inuenta atque intro-
ducta ſint, tum nihil li-

beralius, quàm quòd in Repub. propo-
ſitam in bene agendo mercedem eſſe uo-
luerũt, ut præſtantiſs. & clariſs. ciues, gra-
tia officiorum inuitati, Rēpub. ſtudio ala-
criore conſeruarent. Nullus eſt enim tam
lubricus & ſublimis gloriæ curſus, quem
non ſine cunctatione ingrediãtur, ſi aliqua
præmiorum & celebritatis opinione pelli-
ciantur: nullus contrà tam facilis & aper-
tus labor, quem conetur quiſquam ſuſcipe-
re, ſi fruſtranea & inanis in eo tolerando
induſtria fore uideatur. Itaq; patres noſtri
ſapientiæ iſtius maiorum emuli, ſe tum de-
nique beatũ Imperiũ, & in Imperio uiren-
tem Academiam habituros crediderunt, ſi
ut quiſque optimè de literis & ciuitate me-
ritus fuiſſet: ita ipſe à literatis & à populo
ampliſſimè muneratus diſcederet. Quare
Ducibus, qui rē bellicã foris adminiſtrāt,
Regum ſtipendia numerantur: Ciuibus,

qui domesticæ tectorum, templorum, urbium custodiæ præficiuntur, eorundem honores & magistratus mandantur. Quod si uel in abiectissimis artificiis qui suam operam priuatis hominibus cõtulerunt, quaestu mercenario locupletantur, quid de illorum diligentia statuetis, qui totum ætatis, curriculum in literis elaboratum studiosè transegerunt? Nam cum ex iis, quæ ab ingenio pendent disciplinis non modò uitæ componendæ, sed etiam gubernandæ Reip. præcepta requirantur, à quibus id cognouimus, quo cæteros præmiis donandos intelligamus, illis profectò ipsis, quatum est situm in nobis, & laudem & ornamentum deferre debemus. Quapropter cum Iatrogonistæ nostri, multis exantlatis laboribus Medicinæ fastigium uictores ascenderunt, & biennium adhuc periclitati ad portum incolumes emerferunt, à uobis postulant id quod æquissimum arbitrantur, ut in omnium maximè ardua contentione pari saltem cum aliis iure ac conditione potiantur. Ac ne fortè ambitiosa & impotens petitio ista iudicetur, Auditores grauis. ex ueteri maiorum consuetudine ac instituto paucis comprehendam, quantum uobis &

uniuersis

uniuersis interfit, ut in Rep. homines beneficentissimi spe posteritatis irretiti teneantur . Non est enim existimandum incōsul-
tò ciuiles cœtus iam in pagis & oppidis copulatos concordissima societate coërceri, qui antea in mōtibus & syluis immani bel-
luarum more dissipati uagabātur . Verūm prudētissimi legum latores, qui iura & iu-
dicia ciuitatibus dederunt, cū duo gene-
ra hominum esse comperissent, unū agre-
ste & ferinum, mite alterum & māsuetum,
utriq; ut congruè pro sua natūra provide-
rent, istud obsequiis deliniendū, illud hor-
rore supplicij maleficio submouendum cē-
suerūt . Ac ideo Stoici, qui de moribus re-
liquorum Philosophorū integerrimè sen-
serunt, legem ipsam uirtutum commenda-
tricem, & uitiorum emēdatricem definie-
runt, quoniā felle ac melle promiscuè con-
dita esset , imperarētq; ut aliorum solertia
præmiis , pecunia , honoribus augeretur,
aliorū crimina atq; fraudes damnis , igno-
miniis , uinculis, uerberibus, morte acer-
bissima mulctarentur . Huc etiam quodā-
modo inclitus imprimis physicus Demo-
critus uidetur respexisse, quādo Pœnam &
Beneficium , ut duos genios & potentissi-
mos

mos Cælites uenerabatur, ab iisq; mūdum
cieri, agitari, stabiliri, atq; sustentari com-
mentabatur. Cuius sententiam figmento-
rum integumentis uelatam postea Solon
euoluēs, cū Atheniensium politiam in-
formaret, quasdam leges seueras tulit de
parricidarum & sacrilegorum suppliciis,
alias clementiores de pensitanda ciuibus
mercede, qui populi fortunis & commodis
neglecta rerum propriarum sollicitudine se
totos deuouissent. Sunt enim, Aud. grau.
proborum & improborum uaria ingenia,
neq; uno eodēque uinculo utriq; finibus
honestatis constringuntur: uerū, ut apte
Poëta notauit, sicut

Oderunt peccare boni uirtutis amore,
sic etiam

Oderunt peccare mali formidine pœnæ.

Quamquam si quos terror à delictis magis
quàm recti & equitatis pulchritudo auocet,
sola figura & specie humanos, habitu ani-
mi leones, lupos & portetorum simillimos
existimari oportebit. Mihi autē quia cum
ingenuis uiris, & ad humanitatem decusq;
eruditus sermo intercessit, prodigiosas mor-
talium pestes omittam, ad eorum, quibus
unicè legum conditores incubuerunt, ci-
uium

uium ornatissimorum authoritatē quam-
primū , uobis benignè fauētibus festina-
bo. Nunc itaq; ad Græcorum adolescentes
reuertar, ut quorum discrimina & sudores
prima mea actione audiistis , eorundem
triumphos, & partum ex illustri fortitudi-
ne rumorem mecum nouissimâ recogno-
scatis. Nolite enim putare illos in tam ar-
denti motu , perenniūque corporum defati-
gatione usquam duratūros fuisse, nisi ocu-
los mentemq; in obiecta sibi gloria inten-
tius defixissent. Quare in Olympiis & Græ-
ciæ sacris ludis diuersa præmia iuuenibus
exhibebantur, famæ, pretij, ut quando con-
sentaneum pro uniuscuiusq; uoto & uolū-
tate donum spectaretur, nemo à spatiis & à
cursu absq; infamia retardaretur. Alij co-
ronis & sertis redimiti, quadrigis aureis in
patriam uehebantur : nonnullis statux ad
corporis proportionem respondentes ex-
truebantur : plerisq; uictus publicè in Pry-
tanæo præbebatur : omnibus autem uecti-
galium & negotiorum immunitas, atque à
bellis cessatio tribuebatur. Quod quidem
Romani in sua quoque palæstra quampro-
ximè imitati expresserunt, & gladiatores,
qui palmā in arena meruissent, uacatione
tute-

tutelæ ac oneris, & suauissima tranquillitate compensarunt. Veruntamen non tam carceres & stadia istorum munerum expectatione feruescebant, quàm quòd uictores factorum suorum encomium uersibus & scriptis tractari cupiebant. Etenim ad spectacula Præcones, Poëtæ, Oratores, Historiographi à ciuitate conducebātur, qui Pugilum certamina in frequentissimo astantium cœtu magnificis uerbis proclamaret. Herodotus panegyrica iucunditate: Hippias, Prodicus, Anaximenes stylo grādiore: Pindarus carmine Olympionicas decantauit. Denique si quid strenuè, iustè, astutè quispiam gessisset, illico in cælū ab authoribus extollebatur, passimq; à vulgo illud Pindari dictum usurpabatur, *πεπλεγμένον ἐν λόγῳ μὴ χέμαι σιγᾷ καλύνεται*. Vellem, Aud. grauis. ea nunc apud nos consuetudo increbuisse, ut insignia Ducum, Regū, Imperatorum facinora in aspectum & lucem proferrentur, tandemque aliquando eius Frāciados, quam Poëtæ nostri iandiu parturiunt, Iunonius partus nasceretur. Nam quæ alia ratio fuit, cur ueteres militari laurea & forensi toga uiguerunt, nisi quòd apud illos bene dicentiū, fortiterq; pugnantium

tium nomen & in colloquiis , & in omni concione prædicabatur ? Nunc etiam infidet in probissimo quoq; naturalis quædam procliuitas , quæ noctes & dies animū gloriæ stimulis fodit , atq; admonet non cum uitæ spiritū esse dimittendam commemorationem nominis nostri , sed cū perpetua immortalitate adæquādam . Neq; est enim hoc dissimulandū , quod obscurari nō potest , sed liberè cōfitendū : trahimur omnes laudis cupiditate , nec quisquam tam auersus à Musis , tam criticus & horribilis inuenitur , qui non famæ desiderio incendatur , & æternum laborum suorū elogium literis consecrari ultrò patiatur . Themistoclem illū summū Athenis principem respōdisse aiunt , cū rogaretur quod acroama , cuiusue uocem libentissimè subauscultaret , eius à quo suæ nobilitatis amplitudo celebraretur . Quocirca magnus ille Alexāder cū in Sigæo ad Achillis tumulū astitisset , fortunatum adolescētem exclamauit , cui Homerum laudis suæ præconem nancisci cōtigisset . Item Marius eximiè Luciū Plotiū dilexit , cuius lucubrationibus sperabat Cimbriū & Teutonicū bellum , quod paruis admodum copiis confecerat ,
posse

posse illustrari. Sylla mali cuiusdam poë-
 tæ sedulitatem aliquo præmio stimulandã
 duxit. Pompeius Mityleneũ historiogra-
 phum in corona militũ ciuitate donauit.
 Phalaris Agrigentinus Stefichoro delubrũ
 ædificauit: Dionysius tyrannus Platonem
 equis albis excepit: Vespasianus, Gordian⁹,
 Adrianus, Sigismundus, multiq; prætereà
 Imperatores incredibili literarum & litera-
 torũ amore flagrauerunt. Quid uerò nostri
 Principes? Nūquid prædicationem digni-
 tatis despiciunt, & de se scribi ac nominari
 nolunt? Non est credibile, Aud. grauis,
 cùm uitæ humanæ spatiũ certis limitibus,
 exiguis sanè terminetur, quin optare so-
 leant, quò minus manuum suarũ tela per-
 mearint, eodẽ gloriam famamq; penetra-
 re. Enimuero miror quòd cùm quamplu-
 rimi consiliorum statuas & imagines sum-
 mis ingeniis dolatas relinquere aucupen-
 tur, pauci tamen scriptorum copiam & do-
 ctrinam conẽtur deuincire. At quàm indi-
 gnum & quàm luctuosum est, ut in Opti-
 matũ ædibus lenones, scorta, histriones, ho-
 mūcij, affetatores, mimi, & reliqua Sarda-
 napalici satellitij genera primas occupent:
 docti, & honesti homines, pcul ab illis ex-
 clusi

clusi deturbentur? Qui lenocinia uoluptatum, & libidinis illecebras ministrât, peregrinis & deploratis nebulonibus pinguiâ & opima sacerdotia conferantur: Qui uitę & sapientię fruges serunt, Gallicis bonarũ literarũ professoribus mercedula denegatur? O temporum, ô morũ corruptelam! Quis enim grauis, quis honoratus euadat, nisi suffragiis eruditorũ celebritatem adipiscatur? Quę ciuitas non dicam florebit, sed ne stabit quidem, nisi in eorundẽ ipsorum prudentia & humeris innixa cohærebit? Prisci tres olim Charitas, tâquam nitidis & gaudij effectrices coluerunt, adeo ut si quis mœstitiam alicũde contraxisset, ~~illis~~ ~~illis~~ ~~illis~~ iuberetur. Tres illę Gratię, Auditores grauiſs. quid aliud præter tres summas ſcientias, Medicinam, Iurisprudentiam, Theologiam innuerunt? Quę si quid doloris aut ex animi ægritudine, aut ex corporis labefactione, aut ex bonorum direptione irrepſerit, præſto adſunt, corporis imbecillitatem leuant, animi cruciatus minuunt, poſſeſſioni redintegrandę patrocinantur? At hæ Charites propter ſimplicitatem nudę ab antiquis pingebantur: nunc à noſtris ob eam potius rationem

rationem nudantur, quòd desertæ ac indotatæ à diuitibus profligentur, ac procul ex Regiis lateât, uestibus & opibus spoliatæ. Ergo in tanta temporum perturbatione, & hominum præposterè iudicantiũ peruersitate nihil nos artium impendentem παντολειτουργίαν, nihil proximam Imperiorum uastitatem, nihil Regũ perniciem pertimescimus? Atenim ut sine cultura agri, quantumuis fertiles, fructuosi esse non possunt: ita ingeniorum acies hebescit, nisi honore acuatur, & omnes industriæ nerui lâguēt, qui non munifica nobiliorum benignitate promouentur. Quæ uerò forma ciuitati, quis status, quæ ordinatio permanebit, à cuius gubernaculis docti & sapientes abigantur? & in qua legum maiestas sileat, uis armorum dominetur, cuncta pro imprudentis & profanæ plebis arbitratu misceantur? Bene quidem Antisthenes philosophus ex eo rebus publicis imminētem ruinā à Diis portendi autumabat, quòd in iis nullum proborum & improborum discrimē adhiberetur nullaq, aut virtuti merces, aut peccato pœna præciperetur. Nam si mihi per otij angustias liceret, Auditores grauiſs. omnia priscorum Imperia, Græcorũ, Romanorum,

manorum, Carthaginiensium, Persarum, Gothorum percensere, quanta detrimenta ex ignoratione gentibus illis exorta demonstrarem? Quæ quotiescunque reputo, & in seculi nostri asperitatē intueor, equidem perhorresco, ne artium eximiarum contemptus aliquid sinistri orbi Christiano, præsertim Regibus & Principibus, præfigire ac minitari uideatur. Erit forsità periculosum uitia eorum uerbo perstrinxisse, qui ne quidem se admoneri uolunt: uerū me tacente lapides haud dubiè uociferantur. Quòd si nonnulla spes Reipub. uindicandæ, detestandiq; exitii adhuc affulgeat, literatissimorū uirorum gratias placemus, conciliemus, cohortemur, ut fati atrocitatem auertant, scelera euellant, leges erigāt, iudicia corroborent, uetustatis muniant disciplinam. Sed de his leuiter: redeo iam ad Græcos, qui authores Romanis & posteris extiterūt, ut nemo flagitium impunè perpetraret, nemo ingratum ciuibus studium & operam commodaret. Itaque, ut de reis & fontibus fileam, bene merentibus publicè illi præmia largiebantur, non tantū ut memores & officiosi haberentur, uerū etiam ut cæterorum conatus ad simile

E virtutis

virtutis exemplum instigarēt. Ex quo Solonis edictum inualuit, ut Atheniensium liberis, ubi ad ephebos peruenissent, sapientum sententiæ & grauitè dicta, simulque res militum & ducum strenuæ crebrò inculcarentur: propterea quòd audiēdo paulatim ad laudis amorem raperētur, ac mentem suam contemplatione hominum excellentium conformarent. Quapropter Athenienses magno ludorum apparatu ac pompa quotannis eius diei meminerant, quo innumerabiles copias pauci ad Marathonem campum præfecto Miltiade fugarant, Deosq; patrios ulti, uirtutis suæ monumenta in omnē posteritatis memoriam lapsura reliquerant. Thebani quoque ac Bœoti Leuætricam pugnam Epaminundæ auspiciis fœliciter initam, dum licuit, solenni gaudio atque hilaritate celebrarūt. Est enim generosis & naturæ bonitate præditis adolescentibus nescio quædam innata inuidiæ cupiditas, ut iis æmulentur, qui ea possideant, quæ ipsi possidere concupiscāt, ac proinde à nemine uelint superari, omnibus autem studeant excellere: adeò pulchrum censent digito monstrari, & dicier hic est. Legimus Achillis memoria stimulatam

latum fuisse Alexandrum, ut pericula spontè appeteret, prouincias armis peragraret, inimicorum impetus aspernaretur, de uita & capite pro gloria decertaret. Postea imago Alexandri Iulium Cæsarem sic acriter inflammauit, ut obstructâ Galliæ expeditionem tentare, in mediis Gallorum finibus castrametari, vrbes munitissimas obsidere, omnium populorū odia in se vnum concitare nō dubitauerit. Nisi Græcia Iso-
cratem, Roma Hortensium applausu & susurro demulisset, Aristotelis ac Ciceronis doctrina & eloquentia posterior ætas caruisset. Ne uerò diutius à proposito aberret, & à sententia deflectat oratio mea, an tandem existimatis Pythios, Nemeos, Isthmios & Olympiacos Pugiles nudato corpore luctaturos & congressuros vnquā fuisse, nisi tū demum in animis nepotum se victuros sperassent, cū è viuis fortiter digladiando excessissent? Magno videlicet ac uehementi honoris aculeo pungebantur, qui etiam si omnia secum moritura, nihilq; præter eam, quam in terris sui recordationem disseminassent, residuum sibi ultra fore crederent: tamen animam ultrò in arena, & in prælio euomebant, ut a-

liqua inter superstites commendatione ornati, nomen suum longa serie in plura secula propagarent. Quæ cum ita sint, Aud. grau. vt omnium præmiorum amplissimum à ueteribus gloria putaretur, ut pro ea in sudoribus & miseriis exercerentur, ut Pugiles à Præconibus & Poëtis mirabiliter decorarentur, quid non pariter Iatrogonistæ nostri à me quantulamcunq; prædicationem, à uobis iustam & optatam approbationem expectabūt? Nam si animorum ornamenta corporis operibus anteponuntur, & multò difficilior illa, quàm hæc perficiuntur, non est controuersum quin Iatrogonistarum existimatio maius præciū, fructumq; laudis cumulatiorem mereatur. Et certè, ne quid mentiar, ut Athletæ infinitis partibus robustiores fuissent, quæ inde ad populum utilitas dimanasset? Quid enim Milo Crotoniates quòd inuictus esset, quòd bouem humeris gestaret, taurum pugno mactaret, Reip. præsidij & emolumenti attulit? Quanquam ego nolim decus Athletis attributum derogare, nedum illud mihi arrogare, ut rear maiores parū prospexisse, cum solennes primùm conuentus, & gymnica præludia crexerunt; præfer-

præsertim quando hoc inuētum ualde hætenus laudari. Licet autem in cōtentione meritorum ea moderatio & regula tenenda sit, ut qui æquè iuuerint, æquali trutina compensentur, qui plus aut minus defudarint, iis honorificentiora uel humiliora munera persoluantur : maiores tamen, & uetustissimos ciuitatum rectores uideo aliter statuisse, ut quæ Athenienses & Romani Palæstritis præmia concesserunt, eadem omnino puluerem Iatricum terentibus irrogarent. In quo mirificam Athletarum & Medicinæ Candidatorum animaduerto consensionem, cū pagnarum similitudine, tum mercedis descriptione conuenientem. Atq; hac una præcipuè causam adductus, ut Iatrogonistarū altercationes cum Olympionicarum dimicationibus componerem, potius quàm in Colchidem ad inaurati arietis prædam iandiu sublatam eos relegarem, aut Vlyssi socios, & erroris comites adiūgerem: quæ subtiliter quidem à nonnullis excogitata, sed loco & rebus parū consentaneè accommodata mihi fuisse uidebantur. Vos uerò, si placet, quò facilius totam Athletarum & Iatrogonistarū comparisonem obserue-

tis, audite quid de utrifq; Iurisconfulti nostri loquantur. lubet enim eorum leges propriis legum uerbis recitare.

Athletis, inquiunt, ita demùm si per omnem etatem certasse, coronis quoq; non minus tribus certaminis sacri, in quibus uel semel Romę, seu antiquitus in Gręcia meritò coronati, non emulis corruptis ac redemptis probentur, ciuiliū munerum tribui solet uacatio. Audiamus quid iidem de Medicis decernant. Medicos & maximè Archiatros unà cum uxoribus & liberis, nec non & rebus, quas in ciuitatibus suis possident, ab omni functione, & ab omnibus muneribus uel ciuilibus, uel publicis immunes esse præcipimus, & neq; in prouinciis hospites recipere, nec ullo fungi munere, nec ad iudiciū deduci, nec eximi, uel exhiberi, uel iniuriam pati: uel si quis eos uexauerit, pœna arbitrio iudicis plectetur. Adhęc uictores curriculorū à Pręcone palàm in circo pronunciari, & iuuenibus ad imitandum proponi solebant. Inde Pontifices, qui nauis Christianę clauum dirigunt, & castissimis Musarum sedibus præsident, mandato sanxerunt, ut quantum quisq; in studio literarum profecisset,

cisset, tantundem & honoris & laureę consequeretur. Itaq; ne quis spe mercedis frustratus excideret, in Academia Parisiensi (ad eam enim me adstringam, q̃ immensum foret de singulis disputare) duos Antistites libertatis scholasticę conseruatores atq; tribunos indiderunt, quorum alter grauißima munia moderaretur, quo in præsidio illustrissimus Cardinalis à Castilione, tanquam in excubiis & custodia arcis Mineruę speculatur: alter literatorum exercitationibus interesset, quam quidem personam Ioānes Viuierius iuris utriusq; doctor, & Academię Cancellarius sustinet, tanta fide & integritate, ut nō modò ipsum uelut studiorum testem & spectatorem, sed etiam fautorem & patronum reuerreamur. Is est, Aud. grau. Agonotheta noster, qui Iatrogonistas, diligēter examinatis singulorum uiribus, in libertatem asserit, in ueteranorum militum ordinem cooptat, in clariorem Medicinę familiam trāsmittit. Quod ut decētius fiat, nomenclator deligitur, ab antiquorum præcone non admodū differens, qui nominatim eorum uigilias ostendat, qui postero die ab Agonotheta ad lauream asciscuntur. Ille autem cui hoc

ἱγκωμασικὸν onus traditur, quāobrem vul-
 gari & uernaculo uocabulo Paranympus
 nuncupetur, haud satis scio, tametsi ea de
 re cum uiris Theologis, Medicis, & recō-
 dita cognitione abundantibus curiosè cō-
 municarim. Nisi fortè ideo Paranympū
 uocari cōiectemus, quòd Iatrogonistis nu-
 ptias cū domina Medicina cōtractas omi-
 netur. Græci enim *παράνυμφον*, aliter *νυμ-
 φαγωγὸν* & *νυμφοσῶλον* interpretabantur, qui
 arbiter uiri & uxoris matrimoniū conglu-
 tinarat, unde honoris causa inter utrumq;
 medius plaustro nuptiali uehebatur. Quòd
 si uobis Græci uerbi notatio arrideat, non
 inficior, quominus Paranympsi appella-
 tio mihi competat, neq; iniuria. Siquidem
 auspex & præco ueni, qui uobis nūncium
 significarem connubij & fœderis, quod pō-
 stridie Iatrogonistæ, bonis, ut spero, aui-
 bus cum filia Apollinis, Aesculapij sorore,
 uirgine Iatrica, eiúsq; Nymphis pasciscen-
 tur. Atque utinam quòd nomini & mūneri
 meo plenius satisfacerem, alias illis tedas
 & conjugales thalamos possem augurari,
 profectò me hoc auspicio fortunatū fore,
 multísq; rem gratam facturū considerem.
 Quis enim mercator, quis causidicus, quis
 sena-

senator , quis deniq; paterfamilias in quālibet locupleti & copiosa supellectile, non tales sibi. generos, tales filiabus maritos ambiuerit? Adsunt, ni fallor, in hac hominū lectissimorū corona parentes quāplurimi, qui oculis notant & designāt unumquenq; Iatrogonistarum, & suæ familiæ iam inde destinatū vultu candidiore contemplātur. Quare fortunā undiq; illis aspirantem, suāsque largiter facultates effundentem prospicio, quę mutato flatu mutāda mihi uela suadet, & à labore ad quietem conuersa Iatrogonistarū uita, meam orationē ad gaudia & triumphos esse conuertendam. Non enim amplius tot curis angētur, tot ærūnis conficiuntur, tot in præliis uersabuntur, de rerum euentu tantoperè cruciabantur. Hīc illis miseriæ desinunt, hīc omnes laborum æstus absorbentur, hīc periculorū scopuli obruuntur, hīc dolorū tenebræ dispellūtur, hīc clarissimi lætitiæ dies oriuntur. Quapropter, Aud. grau. gestire mihi uideor, & meo iure quodāmodo triūphare, quòd Iatrogonistarū fœlicitati experior uestram beneuolentiam iucūdisimè gratulantem, & crastinæ lucis celebritati auidissimè præstolantem. Atenim ne quis intercedat, ac
trium-

triumphum interturbet, ne quicquam reprehēdat, ne quicquam omisſum cauſetur, quominus perfectè, iuſtè ac glorioſè omnia magnifica Iatrogoniſtę aſſequātur, nō nullorum Catonū occurrā obtreſtationi, qui cūm præteritas diſceptationes probent, præmia deberi annuāt, præconio aſſentiātur, auſterè tamen & Stoicè negant ſumptus fieri hiſce in rebus decuiſſe. Vetus eſt iſta, & iam pridem ex liberaliſſimo conſortio exploſa querimonia. An nō ſi quis Romæ triumphum aut magiſtratum, ſi quis Athenis gymnaticā palmā adeptus eſſet, oppiparas uiſcerationes condiebat, & populo modis omnibus gratificabatur? Nota ſunt inſuper Philoſophorū ſympoſia, xenocratis lege, & Ariſtotelis inſtituto ſancita, pecuniis que potentiorum ſuſtentata, & Athenæi cōmentariis exarata: quæ quoniā accubationem epularem amicorū, & uitæ coniunctionē haberent, benè maiores conuiuia nominarunt. Quid? Sartores, ſutores & ludicri opifices in tyrocinio edendo nullis impenſis uel hac tēpeſtate parcunt, nos propenſam Iatrogoniſtarum liberalitatem uituperemus? Oderunt homines ingenui priuatam luxuriam, publicā magnificentiā diligunt:

diligunt: non amāt profusas epulas, sordes
& inhumanitatem multò minus: distinguūt
rationem officiorū & temporū, uicissitudi-
nes laboris ac uoluptatis. Quòd si cuiuis a-
pertū ad Medicinæ penetralia iter pateret,
nec cōsideratio personarū ulla duceretur,
quæ ordinis confusio, quæ Medicastrorum
turba protinus emanaret? Quamobrem ni-
hil quod egregiū ac laudabile est, Deus vul-
gi oculis & pedibus arripiendū obiecit, sed
in alto & eminēti uertice locauit, quò mi-
nūs idonei non possent scandere: atq; ut de
gymnasticis Olympionicarū ludis Pinda-
rus refert: αἰεὶ δ' ἀμφ' ἄρεταισι πόρος δαπάναι
τι μάλιστα, πρὸς ἔργον κινδυνῶ κεκαλυμμέ-
νον. Itaque remoto procul impedimento,
& sedata Censorū asperitate restat ut triū-
phi significationem concludamus, & post-
quam sex reliqui ex octodecim Iatrogoni-
stæ in conspectū cum manubiis & trophæis
prodierint, crastinæ lætitiæ statutum & so-
lenne spectaculū opperiamur. Verūtamen
quis prima acie antesignan⁹ progredietur?
quis secundo cornu, tertio, cæterisq; dein-
ceps cōsistet? Nam tametsi omnes uno lau-
dis & uictoriæ circulo ambituq; cingātur,
fieri nihilominus locorum distinctionem
necesse

necesse est, ut qui sint summi, qui mediij,
 qui ultimi à uobis discernantur. Videmus
 siquidē in Curia Senatores & Decuriones
 in subselliis primos uel postremos assidere,
 prout primò uel postremò conscripti fue-
 runt: in supremo Regis concilio, imò uel
 in plebeiis cōcionibus rationem haberi di-
 gnitatis & ætatis. Eodem pacto Cancellarius
 præmiorū præses & distributor Iatrogonistarum
 vnumquenq; pro magnitudine meritorum decorabit, sic tamen ut qui
 in infimum gradū reiicietur, satis honorificè
 ac cumulatè muneratus uideatur. Ergo
 postridie, decimam circiter horam, ad virginis
 Mariæ religiosissimū templū Iatrogonistæ
 coïbunt, ubi laurea cincti ac insigniti
 beneficio Agonothetæ conspiciantur. Eò ut
 tempestiuè accedatis, Aud. grauiss. mirum in
 modum orant & precantur: nullumq;
 pro tantis suis contentionibus testimonium
 uirtutis, nullum insigne honoris, nullum
 monimentū laudis flagitant, præterquam
 crastinæ dici memoriam sempiternam.



EIVSDEM IOAN. VETERIS
breues aliquot Orationes encomiasti-
cæ ad singulos Iatrogenistas præmio
& laurea Medicinæ donandos.

Ad Iacobum Carpētarium Bellouacum.



Rchilocus poëta cū
aliquando Herculi O-
lympionicæ ad citharæ
modulos hymnū pan-
geret, sic exorsus dici-
tur : χαῖρε καλλίνικε, τη-
νέμα, ἄναξ Ἡρώκλεις.

Breuis sanè, sed digna Hercule, ac Hercu-
lis laudum propria sententia : quandoqui-
dem paucis immensam, ac heroicam propè
uirtutem cōplexa est. Quid enim de Her-
cule, quanuis post homines natos fortissi-
mo, amplius prædicari potuit, quàm ut Re-
gis singulari elogio, uictoris honorifico ti-
tulo, Herculis deniq; peculiari ornamento
insigniretur. Vellem, Aud. grau. ea mihi
iam

iam dicendi facultas & copia suppeteret, ut Iacobi Carpentarij studia & conatus enarrare possem : aut uobis ea auscultandi uoluntas, ut quę de illo commemorarem, lubēter omnia sine tædio aurium, & animorum offensione attēderetis, profectò illum Hercule præstantiorem tantò esse demonstrarem, quantò Iatrogonistæ Athletis, Galli ueteribus, sapientes imperitis antecellunt. Quid est igitur, cur ego Carpentarium, si minus ei anteponam, saltem meritò non componam, si ambo iisdem inter se laboribus cōiuncti, si periculis communibus focij, si laude similes inueniantur: hoc solùm differant, quod in illo non nihil suo iure antiquitas comminiscatur, in isto cuncta uerè attributa uideatis. Esto, ἀλεξίκακος à priscis Hercules nuncupetur, quòd aprum, leonem, hydram, cæteraq; monstra domuerit, Cerberum ex imis inferorū faucibus exciuerit, Augiæ stabulū perpurgauerit, demúmque in Olympia publicum Athletis duellum indixerit. An non enim eadem in Carpentario, aut etiam illustriora emicabunt? Qui cū quarta luna genitus, & à Ioue quasi effectus ingenij bonitate ac solertia incredibiliter ualeret, prætercā
conni-

connitendum existimauit, ut & Naturæ igniculos colendo augeret, & Iouis, id est parentū, quos habuit omni honestatis genere ornatissimos, dignitatem imitando adæquaret. Agite uerò, Aud. grau. ne tritam & vulgarem cōmendationis uiam in viro minimè vulgari teramus, omiſſa Carpentarij familia, indole, pueritia, quanquā & in iis multa insunt exquisitè obseruanda, in Adolescentiæ uigiliis insistamus, in iisque leuiter (diu siquidem & accuratè non licet) labores plusquam Herculeos contemplemur. Fuit enim quoddam tempus uel nostra memoria, cum mille portentorum facies, ignorationis, ignauix, barbarix in hac Academia impunè grassarētur, cū Iuno zelotypa, Iouis & rerum splendidissimarum semper æmula densissimis nubibus literarum lucem, ac discantium mentes oculósq; perstringeret. Iacebāt artes altius immerſæ, profundissimaq; obscuritate implicabantur, aut si quæ aliquantulum exurgerent, fūco illitè uenditabantur, & pro abundantia egestas, pro corpore vmbra, pro thesauro, ut aiunt, carbones captabantur. Quid tunc Carpentarius? Cerberum fortassis aliquem ex Erebo traxit, & in

in terras inuexit: imò Philosophiam numero partium cum Cerberi ceruicibus congruentem è tenebris in solem euocauit, euocatam ab obliuione atque silentio uindicauit, uindicatam ambagibus, quibus innumeris scatebat circumsepta, enodauit, enodatam in conspectu & propatulo ad iuuentutis fructum collocauit. Sed tamen nouum ecce monstrum Carpentario suscitatur: Philosophia captiosis inimicorum laqueis irretitur, sordibus adhuc inquinata retinetur. Illic Augiæ bubile fuit detergendum, illic maculæ impuræ loquacitatis eluendæ, illic iniecta philosophico lumini caligo discutienda. Iam triplici satellitio uictor incedebat, & ueritatem à falsitate discretam, naturæ scientiam, & morum sanctimoniam mundo inferebat, cum Leo terribilis, & Hydra lernæa conspirantibus & fraternis animis in Philosophiæ ac eloquentiæ septa petulanter irrepserunt. Dij immortales quāto impetu, quanto robore cum talibus prodigiis Herculi nostro pugna cōmissa est, ne ueneni labes paulatim serperet, néue latiùs contagione circumfusa emanaret! Veruntamen claua & fascibus sibi cūm Rectoria potestate ab Academia

cademia cōcessis, armatus leonem debellauit, & hydrā sophisticā, cui, propter loquacem profluentiā, pro uno sermonis capite amputato multa confestim renascebantur, igni sapientiæ ac doctrinæ machinis prostratam mactauit, tandēmq; pacatæ tranquillitatis usuram desperanti Philosophiæ recuperauit. Atq; ut Hercules Tritoniæ Palladis adiutus patrocinio quolibet alia monstra intrepidè auctit, neq; ullis ærumnarum cladibus debilitari potuit: ita & iste Philippi Belli Meccœnatis sui beneficentissimi auxilio fretus, acerrimas aduersariorū dimicationes, turbulentissimas inuidiæ tēpestates sustinuit. Ex quo deniq; fama eius virtutis vbique gentium promulgata, non mediocrem illi apud doctissimos homines authoritatem conciliauit, cū Galli in unum Carpentarium eruditionis Coryphæum intueremur, & ex ipsius flexanima suada, tanquam ex aurea Herculis catena, mirantes penderemus: exteri autem eius uidendi audiendiq; causa ex disiunctissimis orbis terrarum regionibus Lutetiam non minus frequentes coirent, quàm ad Liuium quōdam uisendum ex tota Italia, & ad Demosthenem ex omni Græciæ par-

te concursus fieri solitos historiæ prodiderunt. Quid plura? Hercules Olympiorum certamen postremò erexisse, ac in eo tam strenuè se gessisse, vires cum aduenis periclitâdo, fertur, ut in quouis gymnasiolorum genere princeps, periodi uictoriam, & uictoriæ testem à populo applausum, ab eruditis præconium reportarit. Te quoque (iam enim propiùs tecum loquar) demẽsum in Iatrico puluere curriculum, & uariis ille artium cunctarum ambitus, quem studio & diligentia peragraſti, sociũ Herculis columnæ adiungit, ut mihi prope modum Hercules alter effectus uideare, ubi primùm palma primaria, quam tibi primario uiro iam pridem debitam Agonotheta me internuncio pollicetur, existimationi tuæ uelut cumulus accesserit.

Ad

AD IOAN. NESTORA

Lutetianum.



Vanquã tua grauitas & eximia eruditio (mi Nestor clarissime) propriis laudibus cõteta nihil cumulatius requirat, & ingenij nostri tenuitas parum lucis tuo splendori allatura sit, patere tamen, quẽso, ut pauca de te in audientium memoria reponam, ne si penitus uelis præteriri, aut consuetudinem neglexisse, aut uocem meam respuisse uidearis. Atenim, quandoquidem noui pudorem, noui moderationem animi tui, quàm procul ab ista auræ popularis cupiditate, quam plerique ambitiosius aucupantur, omni tẽpore aberrarit, dabo operam ut minimo cum fastidio promissi muneris pẽsum absoluiam: idcirco breui tanquam in tabella, quemadmodum ferè solent qui vrbium & prouinciarum situs depingũt, aliquot dũtaxat excellentis famæ capita comprehendam, plura in hominum iudiciis tacitisq; mentibus relinquam, quæ uix cuiusquam ubertas orationis eloquatur. Ac ne longius

F ij uage-

uagetur, certos mihi limites præfigam, ad unius Achiui Nestoris exemplum tuæ uitæ summam reuocabo. Cui enim credibile hoc non fiat, sicut Pontifices Diuorum nomina suscipiunt, quorū in administranda Rep. pietatem æmulari cupiunt: sic te ab isto Principe cognominatum, cuius dotibus tui mores & inclita monimenta mirificè cōsonarent? Nam cū duo sint, quæ in suo Nestore Homerus potissimū admiratur, consilij uis prudentiæ plena & fidelitatis, ac agendi apta ad persuadendum promptitudo, non est meherclè dubium, quin ad utrunque te Natura genuerit, uoluntas excitarit, sedulitas acuerit, usus omnino confirmarit. Nestor in decennali Troianorum obsidione primus ad publicas cōsultationes adhibebatur, quinetiam tantū eius in cohortando ualebat auctoritas, ut quicquid fas aut operepretiū duxisset, unanimi astantium consensione approbaretur. Si castrametari, si Pergama oppugnare, si obsessos adoriri, si exercitum munire, si reliqua militiæ officia curare oporteret, ad Nestoris oraculū confugiendum, à Nestoris auspicio captāda primordia censebantur. In sententia uerò dicenda

mirum

mirum est quàm militum cœtus deliniret, motus impelleret, dissidia cohiberet, timorem expergefaceret: adeò lingua fulgurabat, gestu tonabat, & vultus feueritate cuncta, prout arbitrabatur expedire, permiscebat. Quapropter non iniuria dux Agamemnon præcipuè à superis expetere ac obtestari solebat, ut decem Nestoras nancisci posset: quod cùm accidisset, Ilium breui periturum, ciuēsque in spontaneam dedicationem uenturos confidebat. Ego autem, si modò uotis exitus & euenta succederēt, uexillum nobis oblatum putarem de omni re literaria bene sperandi, ut ea nouem aliis æquè disertis, æquè sapientibus & prouidis fulta sese attolleret, ac iterum decori antiquo redderetur. Nam quis non meminit complures scholas, quæ antea desertæ ac incultæ lababant, cùm primū ad eas apulisti, hac præsentia & aduentu repente exhilaratas, & discentium numero, & doctiū celebritate floruisse? Testis est Bellouaca, cuius in arce primas excubiarum partes tenuisti: testis Barbarana, unde barbariem substituta suauitate deturbasti: testis Cardinalitia, ubi arbores & amœnos Musarum hortos numeroso cantu perso-

nasti: testis Becodiana, quam, tametsi crescentem, auxisti: testis Burgundiana, in quam denique leporis tui ornamenta congestisti. Quæ omnes tam propitiam tuam opem uicissim senserunt, quàm olim Nestoris prouidentia, ut salutari quodam numine Græcorum causa defensa est. Sileo temperantiam utrique uestrûm familiarē, sileo clementiam, uigilantiam, cæteraque uiuendi ac intelligendi subsidia, quæ uos ita mutuo similitudinis uinculo copularunt, ut nisi fortè nefarium, præterq; hominis Christiani fidem impium foret, Pythagoræ *πειλιχενείαν* renouare, ausim iurare Nestora eundem reuixisse, ac in tuum corpus demigrasse, quo nullum habilius, nullum uenustius, nullum magis animi sui domicilio appositū reperiēbat. Enimvero sapiens Nestor & facundus fuerit: at in arenam nō descendit, at in palæstra non decertauit. Imò ne illud quidem à poëta in eius encomio prætermisissum est, apud quē sua ipse certamina his uerbis decantans inducitur:

Ἦν ἔμελλ' ἐγίγνεσθαι κλυτὸν μῆδεα Ἥνοπος υἱόν,
 Ἀγκῆον δ' ἐπ' ἀλὴν πλοῦρ ὄνιον ὃς μοι ἀνέστη,
 Ἴφικλον δ' ἐπ' ἔδρασι παρ' ἐδραμον ἐσθλὸν ἔόντα,

Δεῖ δ' ὑπερέβαλον φυλῆα τε καὶ πολύδαρον.

Sicut in xyſto partim & umbratili meditatione ſpatiatuſ, partim etiā in prælio & in periculis conflictaſ, nunc cum iſtis induſtriæ manuſ conſerendo, hinc cum illiſ curſuſ animorum cõperiẽdo, mox cum aliis ſubtilitate mentis conſligendo palmas innumerabileſ meruiſti, quarum cùm ſingulæ nobilitatem nominis pepererũt, tum uerò corona Olympiaca, quam præmij cauſa tibi ab Agonotheta contextam denuncio, æquale Neſtori Græco æuum, famamque immortalẽ iam inde foeliciter ominatur.

AD ANTONIVM PRVN- rium Lingonenſem.



INDARVS ad ſingulare Pſaumidiſ encomiũ ſe nõ audaciuſ ſolũ, ſed etiam lubẽtiuſ ideò proſitetur accedere, quòd amicorum rebus præclarẽ geſtiſ neſcio quo modo affici, proſpera que corundem fortuna lætari iucundiſſimẽ ſoleamus. Id ego quidem, Auditoreſ grauiſ.

F iiij ſentio

sentio mihi nunc in Antonij Prunerij persona usuuenisse, cuius recordatione cōspēctūque ita delector, ut si tantūm dicendo, quantū poëta ille modulando possem contendere, facerem profectō ut intelligeretis eum me esse, qui honestati fauere, & beneuolentiam uenerari sanctum, pium & religiosum ubiq; iudicarem. At non continuō mediocritatis meæ conscientia deterritus obmutescam: uerūm alacri hilariq; animo pergā ad id, quod officio & necessitudine semel impulsus institui, neq; committā ut Psaumidis canendi iustior Pindaro, quā nobis Prunerij decorandi ratio subesse uideatur. Etenim nihil laudabile fuit in uetere illo Athleta, quod in meo Iatrogonista non idem multō insignius queam ostēdere, nihil uirium in corpore, nihil uelocitatis in pedibus, nihil neruorum in lacertis, quod non in istius ingenio demonstrare. Fuerint breuiter hæc Psaumidis inclita trophæa, equos aluisse, ius hospitij & familiaritatis fœdus coluisse, quadriiugo curru Olympicam metam cōtigisse: alius in Prunerio mentis uigor, alia facilitas, & similiter in studio illustrior dignitas apparebit, siue mores & innocentiam, siue sudores & dili-

diligentiam contueamur. Magnum est & immensum in luce Academiæ, & doctorum quotidiano contubernio eum seruare modum, ut nemini molestus, nemini grauis & iniurius habere, nunquam nisi rogatus societati tete immisceas, nunquam nisi desideratus à societate excedas. Nam ut in epulis diuersæ sunt conuiuarum uoluptates, neque omnes uno ciborum gustu, sed alij dulcibus, alij subamaris deliniuntur: sic quoties uel ad agendum, uel ad colloquendum uenimus, toties incerta de nobis iudicia, opinionum uarietate deprauata concitamus. Ex quo egregia quadam & diuina bonitate uigere illud oportet, qui placeat uniuerfis quibuscum res rationesque coniungit: id quod ne Saturnio quidem Ioui, nedum mortalibus, celsisse unquam vulgari Græcorum adagio terebatur. Potest igitur, Auditores grauis. dubia esse Prunerij comitas & clementia, qui omni tempore sic uel cum alienissimis hominibus uixerit, ut nullum uerbo & leuissima contumelia uiolarit? ut inuidiam lepore, inimicitias obsequiis temperarit? Atenim (mihi obstrepat aliquis) hæc, quæ narras, probitatis sunt insignia: nunc doctrinæ argumenta confectamur.

Rectè

Rectè sanè, & ualdè opportunè eò tradu-
cor, quò mea sponte properabā. Non enim
si uoshuiusce uiri cōdita lenitate integritas
recreat, multiplex eruditio, & diurni no-
cturniq; labores priuatim palamq; exhau-
sti minùs cōmouebunt. Quòd si Psaumidi
equorum cura & educatio laudi uertatur,
propterea quòd gloriosum boni patris fa-
miliæ nomen quondam putabatur, cuius
tandem apud nos momenti puerorū disci-
plina esse debebit, qui quales ipsi euaserint,
talem aliquando Remp. uidētur informa-
turi? Quare Prunerij decus istud est am-
plissimum, quod eloquentiam & philoso-
phiam docendo iuuētutis suæ bonā partem
in palæstra Rhemēsi, Harcuriana, Cardi-
nalitia, Plessæa instruendæ iuuētuti naua-
rit: adeò ut plures ex eius officina, quàm ex
ludo magistri Isocratis gnauī artifices exti-
terint: qui hodie locorum ubiq; dissemina-
ti, præceptoris famam grata immortalique
memoria prosequuntur. Interim cū satis
superque commodis seruiisset cōmunibus,
& de quærēdo eligendoq; senectuti solatio
anxius deliberaret, multaq; vmbratili com-
mentatione instructus, & Syluij atq; Go-
pyli expertissimorum Aliptarum oleo un-
ctus

Atus serium discrimen aggredereetur, obtulit se patronus beneficentissimus Augustinus Coteus, scholæ Cardinalitiæ, quousq; in Cælitum religionem transiisset, moderator prudentissimus, qui Prunerium, expensis eius pro Academia uigiliis, adoptandum censuit, quem in Prytanæo suo liberalissimè foueret, ac Iatricò stadio sese adstringentem singulari munificètia sustentaret. Verùm ô fragilem Fortunam, inanésque conatus, qui medio in spatio sæpè corruunt, & antè in ipsis fluctibus obruuntur, quàm portum prospicere potuerunt! Ecce enim funesto fato, & incredibili literatorum luctu moritur, qui te in suâ clientelam fidemq; receperat, qui non solùm operam, si superstes ad hoc usq; spectaculum mansisset, sed etiam opem & gratiam indubitanter præstitisset. Sed tamen, ut humana fers moderatè ac patienter, nō protinùs spe deplorata à proposito quieuisti: contrà ut semper constantia magis atq; magis impetita uirescit, & altius oppressa erigitur, aduersus ærumnas fortis uiolentiæ firmiter substitisti. Quocirca quemadmodū Psau-mis ad Olympicum certamen quadrigis uectus pcessit, ac inde fausto successu bea-tior

tior rediit : sic tu pariter quatuor gymnastiorū humeris , tāquā quatuor equis albis sublatus in aciem , in discriminē , & ad inflāmatissimas de Medicina dissensiones existiisti , uictoriam nūc demū auspicatā adeptus , ac in primis uictorum ordinibus posttridie futurus , dummodo in præmiorum distributione fauor doctrinæ , munuscula uirtuti postponentur . Ne quis autem me amico assentari , ac familiariū paulò indulgere suspicetur , Aud. grauis. testabor de Prunerio , quod de Psaumide Pindarus , Ἀλγ' περὰ τοι βροτῶν ἔλεγχος. Vos itaq; appello q̄ intrepidè hactenus dimicarit , q̄ acriter vulnera inflixerit , quā artificiosè ictus & petitiones progymnasiorum eluserit . Statuant deinceps quod uolent Agonothe-tæ , quos tamen spero integros fore ac incorruptos iudices : Ego , quoad mihi ex officio incumbit , hac tessera mercedem illi significo destinata , quæ si meritis responderit , calculorum æquitati benignè gratulandum : si fefellerit , nonnullorum flagrantissimæ ambitioni sapienter sibi ceddendum existimabit.

AD CLAUDIVM BAL- lium Cabillonensem.

DVo sunt præsertim, Audi-
tores grauis. quibus Ari-
stoclidem Aeginetâ Pin-
darus extulit, mansuetu-
do & pancratium; quorū
alterum roboris, alterum
probitatis esse, utrunq; uerò in uno homi-
ne rarum eximiumq; cēsebatur. Fieri enim
quamplurimū solebat, ut contraria pa-
lēstritarum & philosophorum essent offi-
cia, cū illi curanda in cute districti tene-
rentur, quò bene niterent: hi de animo tor-
querentur, quò liberi extra corporis obse-
quium foras eminerēt. Vix igitur unquā,
nisi prodigiosè, accidebat, Athletam exi-
stere, uita optimè affectum, ueritatis amā-
tem, & de honestate non iniquiùs sentien-
tem, quàm, qui sapiētiae leges, & regulam
tutandæ societatis dictitabāt. Quamobrem
meritò Poëta miratur Aristoclidem, quòd
omnium horarū homo apud pueros puc-
rum, apud uiros uirum, apud grandæuos
senem temperatè agendo, morum lenita-
tem: tum quòd luctatione, disco, cursu, ia-
culo,

culo, saltatione colludendo, uires & agilitatem corporis ostentarit. Ego autē, si pluribus liberet in Claudij Balliui oratione diuagari, manifestò docerem quid in Iatrogonista uirtus possit, si fortioribus lacertis innitatur. Potestis ergo, Auditores graui. de illius prudentia in dubium uenire, qui homo per se notus, absq; ulla maiorum cōmendatione res suas ad iucūdissimum honoris portum prouexerit? Potestis de illius doctrina ambigere, quē Hieronymus Lopusius medicus clarissimus, & Auinionenses Guilielmi domum suam opima cōditione receperūt? quem celeberrimi huiusce Academiae doctores cognitione atq; colloquio dignum iudicarunt? Qui cū in Auinionensi & Monspeulano circo multū sudasset, postea Lutetiæ mathematicum puluerem attigit, atq; tum in philosophia, tum in Medicina seipsum penit⁹ corroborauit. Deniq; artium cūctarū oleo imbutus, ut Aristoclides, alter, & firmisimis humeris uideretur, ab illustri Guilielmorū Auinionensium familia, & Rhemēsi gymnasiarcho Theologiae integerrimo Antistite adductus tandem fuit, ut publico spectaculo apertam ingenij sui aleam tentaret, neq;


ab istis spatiis deterreretur, in quibus alios prosperè cerneret altercari. Ac in iis per totum biēnium nō luctatoris modò, uel saluatoris, sed pācratiastæ munus obiuit, cū nihil in latissimo Medicinæ campo reconditum esset, quod in solē non statim emitteret, de quo non ipse socios percontaretur. Neq; uerò Aristoclides quinque genera facrorum ludorum toties frequentauit, quoties Ballius noster quinq; summas Medicinæ partes, qui nō cōtentus Physiologicè, ut quidam: nō Aetiologicè, ut pleriq;: non Therapeutice, ut fermè uniuersi: salubrem insuper & Simioticen modis omnib⁹ indagauit. Itaque qui tandiu, totq; in spatiis certauit, donec periodū exercitationis absolūtæ cōcluserit, eū ne præmio suo æquissimus Agonotheta defraudabit?

A D

AD IACOBVM HVSTEVM
Baiocensem.



ἵνα ξιφόμενους ὕμνοι,
τῖνα θεόν, τὴν ἥρωα,
τῖνα δ' ἄνδρα κελαδόνισμι;

 Quid enim mihi non liceat, Auditores grauiſſiſſiſdem Iacobum Huſteū uerbis interpellare, quibus Pindarus elogium Theronis Agrigētini prætexit? Nam ſi in hanc corporis & mēbrorum figuram reſpicio, Alciadiadem quendam: ſi familiæ ſtemmata recenſeo, heroa generoſiſſimū: ſi ad egregiè ſcientérque geſta propiūſ me conuerto, non dicam Deum, ſed partum tamen aureum & cæleſtem mihi propemodum uideor, lētórque intueri. De vultu, quanquā index ſit animi, & adumbrata internæ pulchritudinis imago, nihilominus cōticeſcā, ne ut Lyſiæ orationem, quia parū virilis eſſet, Socrates viriliter repudiauit: ſic meā uos quoque molliorem, & iſta loci ac perſonarum authoritate indignam ſtatuatis. Huc accedit quòd uana & inanis opera impenditur, ut externi foris colores arceſſantur,

fantur, ubi perspicuis propriarum uirtutū pigmentis abundamus. Theron à Cadmo, & primis Thebarum conditoribus stirpis suæ antiquitatem repetit: non quæro quàm probabiliter, imò ne reluctor quidem quominus se diuinam sobolem, & (ut quorūdā superstitione fuit) *δίοσκουρον* iactet: licet in auorum splendore, adcò insolēter antiquitas mentita est, ut nemo in Italia non à Romulo, Scipionibus, Fabiis, Metellis, Cæsaribus: nemo in Græcia non à Cecrope, Inacho, Epaminunda sese profectum uenditarit. Quo uitio etiamnum laborant nōnullæ nescio quorum populorum pestes, lenones, ganeones, uenefici, exules, ex reliquiis Catilinæ ad hæc secula propagati, quos cū domestica egestas, & ætas flagitiosissimè acta exterminarit, huc confluūt, & huc, ut Francica finit vrbalitas, superbissimo ac regali fastu dominantur. Tu uero, mi Hustee, ut nihil confingas, ut modestiam tuam & natium pudorem retineas, tamen abundè celebris, atque cū tua, tum maiorum dignitate cognitus eminebis. Alanus ille pater tuus, Herculis Estēsis Ferrariæ ducis in agro Bellocasino patronus, & frater, Regis Christianissimi

G aduo-


aduocatus, uterque inter Romanos iurisprudentes eloquentissimus, & inter eloquentes iurisprudentissimus: deinde Baiocensis Diocesis Cancellarius Oliuarius Conseil, quem uerè à consilij sapientia ita uestrates nominarunt: denique grauissimi Fontanonus & Longanonus Cœnobiarche, aliique propinqui & affines uestre familiæ Theronis, credo, nobilitati cōcedunt. At enim propria laus hæc Theronis fuit, quòd ab ineunte adolescentia assuevit, benè aliquandò ut equis, optimè vt armis uteretur, & non nisi multa crebrâque prolusione confirmatus ad legitimum discrimen prodiit concertaturus. Maius est adhuc quod tu uix puer annorum nouem à patre amantissimo Lutetiam deductus, Graium Latiúmque puluerem contriuiisti, & in utraque arena aduersus quolibet progymnastorum technas teipsum toto adolescentiæ tempore insigniter munuiisti. Ac cum ueterani in philosophica & medica lucta magistri & aliptæ, Syluius, Gopylus, Olerius, Petreius, Duretus, Eques, secūdo quodam numine dextròque Mercurio tibi obtigissent, non est difficile augurari quid tantis gladiatoribus intētus profeceris, qui
nullas

nullas unquam æmulandi, tentandi, conferendi partes & tempora neglexisti. Quare iandiu ad Iatria præparatus, & ad omnē ingenij motum expeditus uidebare, nisi studium illud, quod de communi utilitate procuranda concepisti, paululū te à priuatis studiis ad docendi munus, & bonarū literarum exercitationem reuocasset. Itaq; magisterij, ut uocant, lauream, & gymnasticæ professionis libertatem adēptus, primum Rhetorica & Philosophica in Harcuriano circo, deinde Philosophica in Le-xouæo per decem annos continenter tractasti, ea de te apud omnes concitata existimationis fama, ut unus in Academia iudicareris, qui laboriosissimè prælegeres, qui auidissimè in iuuentutis fructum incumberes, qui Græca cum Latinis, philosophiā cum eloquentia, sermones cum rebus aptissimè coniungeres, qui denique in Aristotele interpretando, præcepta differendi euidentissimis mathematicorū exemplorum demonstrationibus illustrares. Interim dum hisce in rebus desudas, & in otio literarum negotiosè uersaris, à Theologiæ doctoribus Orator designatus, & septem Cādidatorum præconio commissus fuisti:

quorum causam sic eleganter, sic disertè egisti, ut cuncti, qui te audiuius, incredibiliter miraremur, tantos lepores & flosculos orationis ab homine philosopho & medico decerpi potuisse. Ex quo, tametsi ad iuris & legum scientiam, quæ tuæ cognitioni tam est hereditaria, quàm olim esse ferebatur Scauolarum, necessariis à patre argumentis distrahereris, in proposito latreriorum cursu constâtissimè perseuerasti, nec tuorum precibus & blanditiis potuisti dimoueri, ut ab Academia Parisiensi, quæ te præter ætatem tuam & mortalitatē iam diuinis honoribus affecerat, & mox summum illum Rectoratū, quasi trimestrem Dictaturam destinabat, unquā diuelli posses, atque ut à Medicinæ præsidio deficeres, quò in aliud discendi stadium infana lucri & magistratuum affectatione inclinares. Prudēter quidem (Iacobe Hustee) ac consideratè fecisti, ut in ea Academia, & studiorum acie pergeres colluctari, cuius custodiam tibi Natura demādauit, uoluntas reseruauit, diligentia laborq; consecrauit, & in qua toties ea virium & agilitatis documenta edidisti, ut parū absit quin Herculis columnas attigeris, iam complurium celeritatem

celeritatē cursu ingenij præteruectus. Ma-
 ste igitur uictorię cōpos expecta brauium,
 nō oleaginam Theronis coronam, sed ui-
 rentem Agonothetæ lauream, cuius flori-
 bus capite redimitus gestias in posterum,
 & non modò apud Baiocenses nunquam
 intermoritura opinione donatus, uerum-
 etiam tota Gallia peruagatis virtutum &
 doctriņę titulis exornatus, patria, literis, a-
 micis, uita, ac longè dulcissima doctissi-
 morum & principum uirorum consuetu-
 dine quamdiutissimè perfruaris.

AD NICOLAVM ODOAR-
 dum Lutetianum municipem.

 Tsi in vrbibus molli cul-
 tu ad ornatum & huma-
 nitatem ciues educētur,
 in pagis arido uictu, &
 manuum callo sensus re-
 tundantur: tamen impiū
 esset asserere, Auditores grauis. adeò ini-
 què in Dei Opt. Max. cōcilio deliberatū,
 ut pro loci & maiorum conditione nostra
 ingenia uel ad Reipu. culmen euehantur,
 uel ad ruris humilitatē necessariò demer-

gantur. Contrà obseruatū antiquitūs, & hodie adhuc usitatum ac frequens esse intelligimus, ut agricolarū filij propter doctrinam in ciuitatum gubernaculis sedeāt, at Patritij adolescentes ex inanitis familiæ opibus ad aratrum perditī relegētur. Quis enim nescit quoddam apud Romanos seculū fuisse, cū in opere Fabritius & Dentatus per legatos salutarētur, qui Dictatores fierēt? cū ex aratoribus oratores procrearentur? cū uita rustica parsimonix, officij, iustitiæ magistra, & aruorum cultura, non arte, sed cœlesti spiritu percepta crederetur? Possem & ipse huius, quanuis corruptissimæ, tempestatis quamplurimos nominare, tenui fortuna, & genere subobscurō, qui dignitatem sibi, uiamq; in uestrū ordinē, & multò amplissima senatus subsellia authore industria repererūt. Sic igitur se res habet, ut quemadmodum ex horridis dumetorum spinis rosæ, & ex præruptis montium uisceribus gemmæ eruiuntur: ita etiam ab humili propagine clarissimi uiri dimanēt, qui eò plus quàm urbani sapiunt, quò in sapientia diligentiorē operam studiumque collocarunt. At ne prolixior, si exempla subiiciam, sermo protrahatur,

hatur, Auditores grauiſs. duos pro multis ſumam, Glaucum palæſtritam, & Odoardum Iatrogoniſtam, utrumque colono parente ortum, ac nihilominus in ciuitatibus inter honeſtos annumeratum. Quid enim Glaucus in Græcia florentius adipiſci potuiſſet, quàm ut in Olympiis palmâ æmulos omnes fruſtraretur? Adeò ſiquidem ſolennis & magnifica ſacrorum ludorum uictoria fuit, ut pluris haberetur, certaminis coronam inter Athletas meruiſſe, quàm ciuilem inter Arcopagitas magiſtratû obtinuiſſe. Nolim ego tamẽ Glauci gloriam tantoperè uerbis exaggerare, ut non Odoardus ex comparatione illuſtrior relinquitur. In quo ne tritis nonnullorum ueſtigiis inhæream, qui ridiculè integros totius uitæ commentarios deſcribunt, pauca ſummatim cõplectar, cætera largiter in uniufcuiusque ueſtrûm iudiciis infixæ commendabo. Is itaque à patre chariſſimo Lutetiâ miſſus, ſedulò & aſſiduè nauauit, & breui interiecto tempore ſocios acumine, magiſtros ſolertia ſuperauit. Paulò poſt philoſophica laurea ornatus, ut aliis rependeret quod ab aliis antè acceperat, ludû aperuit in palæſtra Caluica & Barbarana, ubi iu-

uenibus aliquot annos eruditis , præmij gratia, conspirantibus comitiorum suffragiis, præses Academiæ, Musarum Gallicarum Apollo designatur. Quem honorẽ sic prudenter, sic accuratè gessit, ut si perinde nostræ gentis, ac uetustatis facinora deoscularemur, meherclè istius Rectoratus, nõ aliter quàm Ciceronis Cõsulatus iactaretur. Dicam enim quod ipse audiui , quod uos testari potestis , nullius unquam maiorem constantiam, & grauitatem in dicendo exitisse, quàm nuper Odoardi , cū in suprema Curia causam Academiæ & Rectoriã authoritatem defendit , quæ à quibusdam insciis , & à Musarum salute auersis nebulonibus pertinacissimè oppugnabatur.

Hic exundauit aureū eloquentiæ flumen: hinc extorta est opinio , quæ de nostris doctoribus inueterauerat , nihil illos præter scholasticā latinitatē sonare , neminemq; , nisi forenses Rabulas in legitimis disceptationibus præpotentem . Quid postea Odoardus ? Sedatis magna ex parte litibus , & otio literis restituto, fasces summittit, quò liberius Iatricum curriculum ingrediatur, cui se iampridem meditatus accingebat.

Atque in eo quidem subinde cum singulis
Pro-

Progymnasiis configendo, bis autem uniuersorum imperū sustinendo, tantum specimen præbuit fortitudinis, ut non minus arduum vulgò uideretur cum Odoardo, quàm olim cum Glauco aut Coryco colluctari. Quamobrem, Aud. grau. si Glauco, qui uires quidem firmas, sed parū necessarias attulit in arenam, Hellanodicæ statuas erigi censuerunt, quid uos de uestro Iatrogenista decernetis, qui animi facultatem decoram sibi, cunctoq; admodum orbi salutarem in Medica pugna declarauit? Id uerò nō inficiatur Agonotheta, qui hominem per me hortatur, benè speret de reliqua ætate, ut eam deinceps tranquillam, spemq; æquabilis fortunæ à Diis immortalibus exoptatam consequatur.

AD IOANNEM RO-
chæum Heduum.



Qua in elemētis, aurum in metallis, & sol in sideribus, Audito. grau. tātum principatu ac necessitate præpollent, ut ex iis mortalium uita, cultus

cultus & uoluptas propemodum constet
atque proficiscatur. Nam & aqua tum cor-
porum formæ coalescunt, tum etiâ nutriū-
tur, ut non frustrâ eam nō modò ex initiis
rerum vnum, sed initium per se ac unicum
Thales Milesius asseruerit : & pecunia op-
portunæ bonorum cōmutationes & mer-
caturæ connectuntur, ac tanquam aurifi-
cis statera æquabiliter librata hominibus
inuicem communicantur: & sole arbores,
tectâ, fruges, cuncta deniq; cæli soli; ani-
mantia collustrantur, ut nō iniuria dux &
moderator luminum reliquorum, oculus
mundi & temperatio à Philosophis appel-
letur. Hæc Pindarus Hieroni Syracusio
hymnum concinens ad Olympiorum ex-
cellētiam, & Hieronis præter cæteros cur-
sores nobilitatem amplificandam attigit:
quæ in meam quoq; Iatriorum actionem,
& in istius uiri personam competere deri-
uarique possunt, nisi metuendum sit, ne
Medicorum artem magnificentius extol-
lendo, Iurisprudētiæ nostræ ac Theologiæ
sua dignitas detrahatur, aut certè immi-
nuatur: né ue Ioannem Rochæum cū aliis
progymnasiis componendo, præpositum
illum fuisse, longoq; pòst interuallo reli-
ctos

ctos se despectósq̃ue conquerantur. Veruntamen (ut Iatrogonistarum, quibus æquè consultum uolumus, mutua collatio, ui- tandæ inuidiæ causa, fileatur) affirmabo, & hoc pace omnium uestrũ, qui adestis, ar- ctissimè tutabor, nihil in Syracusio Rege tam eximium fuisse, quod non iste subtili- mentis acumine, diuturna exercitationis assiduitate, infracta studiorum cõtentione superarit. Hiero à modorum cantu, & so- norum, qui sub aurium mensuram cadũt, elegancia perbellè celebratur. Erant enim priscis maiorum seculis haud paruo in pre- tio, qui uocum dulcedine fidiumq̃; cõcen- tu populum demulcebant: ex quo solennis ritus in symposiis citharam pulsandi obser- uabatur, quã qui recusassent, ob id (quem- admodũ de Themistocle accepimus) im- peritiores habebantur. Sed tamen artium humaniorum complexionem, quæ ab an- tiquis uniuerso Musices ambitu includeba- tur, eò pluris æstimari decet, quò magis est in toto genere, quàm in singulis duntaxat partibus elaborandum. Quem igitur mox Ioanni Rochæo applausum præparetis, qui modulos omnes actionum, & sentētiarum nervos percaluit? qui æqualibus interuallis

elo.

eloquētiæ, philosophiæ, poëticæ, medicæq;
 scientiæ melos consensumq; nouit dimeti-
 ri, & tanta consilij atq; iudicij moderatione
 uti, ut vicissim tria nobilissima Academia
 gymnasia, Burgundianum, Rhemenſe,
 Becodianum nō inertius, quàm Hiero lo-
 cupletem Siciliam administrarit? Quòd si
 per tēporis angustias, ueſtramq; in auscul-
 tādō æquanimitem, pedi, sicut dici solet,
 calceū, & parem meritis liceret orationem
 accommodare, ultrò id apud uos pleneque
 perficerem, quò Rochæi aluearia mellitif-
 ſimis fauis referta delibaretis. Fuit aliquā-
 do apud ueteres honorificū, propter impe-
 rij authoritatē, in Græcia nasci: vnde per-
 uulgata est Philosophi iactatio, quòd po-
 tius in Græcia, quàm Scythia, quòd Athe-
 nis potius, quàm in alia Græciæ prouincia
 natalitium spiritum traxisset. At iste, si pa-
 triæ decus ad solidā cōmendationem non-
 nihil pertineat, Heduorum ciuitatem Cæ-
 ſari amicam, Romanis fœderatam, docto-
 rum linguis & scriptis ornatam ostentabit.
 Adhæc auos, parentes, propinquos, non
 fumosis imaginibus, sed famæ titulis &
 virtutum insignibus celebres inclitósque
 reuocabit. Hinc si ad ea, quæ propius nos
 attin-

attingunt, excelsas intelligentiæ vires delabatur, quot simulachra prudentiæ, quot cruditionis pignora sudoribus collecta exhibebit? Enimuerò nequicquam me torqueo, qui in cancellos orationis breuissimæ, uelut in pistrinū, eius uiri triumphos coner compingere, qui nullis regionibus definiuntur, solis orbis totius finibus latè dispersi comprehenduntur. Cogitate igitur (uestre siquidem cogitationi cōmitto, quod capere nullius in dicēdo fœcunditas possit) uirum aliquem adminicula corporis, animique dotes gnauiter excolentem, iniuriarum patientem, solertia & sagacitate præditum, eloquendi lenociniis & poëtarum riuulis exuberantem, quouis artium, & liberalitatis flore copiosum. Is enim mihi, si quisquam, erit Ioannes Rochæus, absque fūco uiuis coloribus Musarum penicillo depictus, & à Deo destinatus, in cuius capite, ut in Amalthææ cornu, fons honestatis, idea officij, disciplinarum penu reconditum lateret: unde Rochæi cognomen non sorte temeraria insitum, sed cœlesti afflatu inditum sumpsisse uideatur. ita me Dij amēt, nisi reuererer assentationis suspensionem, nunquam eius laudem
comme-

commemoratione satiarer: atque ut sobrij
conuiuæ solent in quantumuis oppiparo
ferculorum apparatu ad explēdam famem
uno cibo esse contenti, plures horas in hu-
iusce mentione non inuitus consumerem.
Verum quoniam longi adhuc itineris uia
hodierno die obeūda restat, desiderio meo
superfedendum est, illucque iam, quod me
reliqui progymnasi uocant, citissimo gra-
du festinandum. Agite uerò, Aud. gra. in
altera libræ Critolai lance Hieronem Sy-
racusium, in altera Rochæum Heduum,
& utriusque uictoriam imponamus: uter
tandem, aut utrius amplitudo præponde-
rabit? Nā tametsi magnū sit, quod ex equo
nullis ephippiis, nullis habenis coercito
athleta Pindari pugnavit, cursūque à carce-
ribus inito metas trāsiliuit: multo nihilo-
minus admirabilior Iatrogonista noster æ-
quissimis rerū Censoribus uidebitur, qui
sola fretus industria, nullius auxilio suble-
uante primū Rhetorici & Philosophici pul-
ueris molestiam multos annos: deinde Ia-
trici curriculi difficultatē bienniū exantla-
uit. Quapropter satis est, quod hucusque
tolerauit, reficiat se à negotio in posterum,
& fruatur suauissima trāquillitate, ac præ-
mio

mio ab Agonotheta auctus, in honorum
& otij portu conquiescat.

A D M A V R I C I V M

Cordatum Rhemensem.

Socrates summus præcipiendi
magister, Auditores grauis.
pueros bona indole, ac præci-
pua ingenij fœlicitate præditos
Σωκράτης solitus fuit appellare, quia faci-
lius quàm cæteri ad disciplinam flecteren-
tur, atque à Mercurio & à Minerua infor-
mati, nō ab homine progeniti uiderētur.
Sunt enim plerique adeò crassi & hebetes,
ut si diurno nocturnoque opere incudem
eandē tundant, nihil omnino eliciant, na-
tura refragante: alij è diuerso sic habiles &
prompti ad intelligendum, ut rapiant cele-
riter quicquid legendo, audiendo, uiden-
do uel leuissimè animaduertant. Hęc ego
cū in Hippocleæ elogium nuper incidis-
sem, apud me admirans reputabam, quòd
ille à Pindaro uix ex ephebis egressus inter
Athletas Diaulodromos referatur, iisque
laudibus exornetur, quas ne in uirum qui-
dem posse competere existimabam. Atque
vbi

vbi postea in Cordatum attentius respexissem, tum demum meam sententiam, quæ ab Isocrate persuasa iam animo infidebat, tenaciter confirmaui. At nec ipse Pindarus negat Hippocleam auspicio Apollinis supra ætatis vires perfecisse, ut ad diaulū admissus progymnasios uelocitate anteiret. Quare diuino quoque beneficio tribuamus oportet, quod Cordatus ista iuuenili pubertate maturam & deflexā multorum senectutē eruditionis uarietate adæquarit. Veruntamen benigna indoles, tanquam agri feraces, cultura indiget, quod uberiores fructus reddat, & stylo artium liberalissimarum acuēda est, ne torpedine languescat, ac igniculi naturaliter inditi negligentia extinguantur. Quamobrem noster Iatrogonista, sicut legitur de Hippoclea, parentum munificentia ingenuè a tenellis unguiculis institutus, primū Rhemis (nam ibi natus est prætore urbano, celebri vrbe & copiosa, honestissimisque literis abundanti) deinde Lutetiæ omnem didicit Rhetoricę & Philosophicę rationis exercitationem. Post, ubi tyrocinij rudimentū posuisset, & gymnica professionis iura impetrasset, in amplissimis Burgundionū

& Becodianorū spatiis aliquot annos gra-
uissimum aliptę munus factitauit. Porro
recordatus illud *σπάργαν ἑλαχς, τάνταν
κώμα*, confestim ad Iatricum stadium di-
uertit, ut in quo deliberationis suę scopum
defixisset, in eo potissimū conniteretur.
Quis enim operępretium non duxerit, ut
postquam de futuro cursu statuerimus, ad
cum nostra consilia, uigilias, cogitationes
à pueritia dirigamus? Nunquam equidem
cum illis prouidē actum arbitrabor, qui a-
dolescentiæ florem & neruos in nugis atq;
minutissimæ operę concertationibus in-
sumunt, pōst effceto iam & uieto corpore,
stuprísque debilitato, forum, castra, cla-
morem, Iatria meditantur. At uerò lau-
danda Romanorū consuetudo, apud quos
ab incunabulis qui Curix uuebantur, de
duodecim tabularum legibus balbutiebāt:
id quod similiter ciues Tolosani liberos
suos æmulari uoluerunt. An non & apud
Persas uenationi ad speciem bellicam in-
fantes assuescebant? in Græcia, luctandi,
sagittas uibrandi, discos iaciendi usum à
præfectis docebantur? Rectē igitur Corda-
to hætenus consultum est, ut medicinę in-
stitutum opportunē capefferet, ut totum ei

se dederet, neque in Grammaticorum & Rhetorum puluere, ut faciunt complures, qui prudentissimi sibi uidentur, imprudentissimè consenesceret. Quapropter Syluio, Gopylo, Lafileo, Petreio, Dureto, expertissimis Iatriorū rectoribus sese ungendū & expoliendum consecrauit, iisque medica signa tollentibus septem annos strenuè militauit. Quòd si schola Philosophos, iudicium Oratores, officina artifices, palæstra pugiles absoluit, ambigere non debemus de Cordato, quin tanto tempore, tanto studio, tantis doctoribus magnam in diaulo Iatrigo celeritatē fuerit assequutus. Etenim ad superiora ut Hippocleē Thorax amicus, uel ut Aesculapio Chiron centaurus: sic isti Stephanus Iustus, utriq; nostrū præceptor in eloquentia eloquentissimus, consiliarius & hortator accessit, à quo uehementer ubique incitatus nusquam potuit cura & sudoribus defatigari, nullo unquam à carceribus impedimento retardari. Nam tanta in homine uultus seueritas erat, ut eius conspectu ab otio, à lusu, ab intempestiuis conuiuuiis, à pila, & iis cupiditatibus, quæ reliquorum mētes occupatas detinent, auocatus, nihil nisi laborem

in

in uita, nihil nisi laudem in officio moliretur. Postremò, Auditores grauiſſ. talibus monitis, adhæc continenti agitatione, multorúm q; præceptis ritè præparatus, atque (ut ſciens poſſum uerè profiteri) oleo doctrinæ, quemadmodum Iatrogoniſtam decet, toto corpore deliburus, hoc ſtadiũ, quod eſt quaſi Hippocleæ diaulum, bien-
nio, uelut duplicato geminóque curſu pererrauit. Quid ergo? Pindarus Hippocleæ patri cenſet geſtiendum, quòd filium adoleſcentem uiderit uictoria cohoneſtatum: nec tandem lætabitur pater Cordati, cùm illum audiet demenſo curriculo ad metam perueniſſe?

AD CLAUD. CARLOTVM
Nouiodunenſem.



Miramur Pindarum, Auditores grauiſſimi, & egregium ſcriptorem profite-
mur, qui ita creber eſt rerum frequen-
tia, & ita uerborum numero

aptus & preſſus, ut ambigamus utrum res oratione magis, an uerba ſententiis illuſtrarit. Miramur itidē palæſtritas, & quā-

uis ignotos ac iam diu fato extinctos propter uirtutem dignos arbitramur, quorum memoriam sæpenumerò recolamus, nullaque longinquitate seculorum obliterari patiamur. Meritò fortassis, & id quidem, meo iudicio ualde sapienter, si modò caueamus, ne ueteres immodicè prædicādo, nostrorum hominum gesta peritus obliuisci, aut negligere uideamur. Nam quæ amentia est tam sinistrè meritam de posteris parentem Naturam cōcedere, ut collatis in maiores omnibus pignoribus & prædiis, nihil reliquum uoluerit ex locupletissima hereditate ad nos peruenire? Quare laudentur illi qui & armorum potentia, & literarum scientia antiquitus floruerunt, sed tamen ita laudentur, ut nostræ tempestati sua officia relinquantur, & officiis neque merces, neque gloria derogetur. Vos itaque, Aud. grauis. ut Pindarum Opuntio Epharmosto hymnum pangentem legatis auidissimè, nihil moror, dum mihi eam beneuolentiam tribuatis, ut de Carlotobre uiter dicentem pristina patientia & benignitate auscultetis. Nam quid est adeò eximium in Epharmosto, ut unicè debeat inculcari? atque, ut loquitur Poëta, generoso

roso equo & alata naui per terras & maria diuulgari? Natus est primùm in Opunte patria, ubi Themis honestatis dea, & æquitatis alumna ciuitatem moribus optimis fundauit: tum à patre ad palæstram missus, in eaq; multùm assuefactus, Pythico & Olympico ludo uicissim coronâ luctatione reportauit. Nihil insuper Pindarus de suo Athleta cecinit: at ego possim plura in meo Iatrogonista notare, quæ nemo uestrùm non excellentiora assentiatur.

Occurrit Picardia, regio non soli fœcunditate & vrbiū pulchritudine duntaxat: uerum etiam armis, religione, ac institutis clara, in qua & belli propugnacula, & pacis ornamenta, ac Imperij Francici perugia petuntur: in qua ueneratio Cælitum, & utilissima Palladis Martisque studia feruent: in qua denique ciues constantia, fidelitate, iustitia incliti uisuntur. Occurrunt etiam istius parentes, inter Picardos fama insignes, artificijs noti, opibus affluentes. De quibus non agam plenius, ne onus uidear deferere quod est mihi impositum, ut nihil attingam quod non viri proprium sit, ut nihil extrinsecus requiram, quod cum aliis oporteat communi-

cari. Est enim Carlotus huiusmodi, ut quæ
Natura aut fortuna impertiuntur homini-
bus, in iis rebus se uinci animo æquo ferat:
quæ ipsi sibi homines parare queant, in
iis se uinci ferre non possit. Semper, mihi
credite, animi ea magnitudine ualuit, ut
quandiu in Academia luce, & in erudito-
rum collegiis uixit, nulli unquam cesserit,
tametsi de se modestè senserit, primas ubi-
que partes obtinuerit, atque siue philoso-
phicam aciem in schola Plessæa, siue Rhe-
toricam in Montana tentarit, non mino-
ris habitus in hoc Mineruæ concilio fue-
rit, quàm Carolus ille Magnus, à quo co-
gnomen duxit in latè patienti orbis domi-
cilio. Quapropter per omnes honorum
gradus ad fastigium Rectoratus ascendit:
quæ dignitas nemini permittitur, qui non
Rempublicâ literariam infinitis antè obse-
quiis deuinxerit, & per multos annos in
scientiarum cultu impensè uacarit. Nam
qui Rectoratum in sacratissimo Lutetiæ
Palladio decenter administrarit, huic in
dominando non deerit prudentia, quem-
cunque in ciuili Senatu magistratum for-
tiatur. Est aliquid maius quàm quidam
rentur, præsidere Musis, & principem
occu-

occupare locum in ea Academia, quæ quia vniuersitati moderatur, & unde ipsa regatur leges ac iura præscribit, rectè à Gallis familiari uocabulo Vniuersitas nūcupatur. Conferte iam, Auditores grauis. Epharmostum cum Carloto, ac vtriusque facta & titulos penditote: nunquid tandem illius municipium, Picardiæ: dotes, Rectorio istius elogio respondebunt? At ulterius pergamus, & ad extremum certamen progrediamur, siquidem ex euentis hominum actiones & opera exploratiùs dignoscuntur. Epharmostus in cœno apprehensum aduersarium, quicum certabat, abiectum supplantauit. Esto. Nam si colluctatio quidpiam commédationis habeat, quot Britones sese uenditabunt, qui quosuis Athletas manibus constrictos, tibiis implicatos humi prosternant? At ingenio pugnare, septendecim Iatrogonistas alternis uicibus, & quamplurimos Iatrodicas excipere, nec pedem mouere, hoc qui faciat, non eum cum antiquis comparabo, sed exquisitis supra mortalitatem encomiis decorandum proclamabo. Quòd si nihilominus palmam Epharmostus pro exiguo uirium specimine meruit, quod

præmium Carloto persoluetur , qui toties in uestro cœtu cum suis progymnasiis luctando inuictus ad hoc usque spectaculum permansit? Spero uos, Auditores grauis. non immemores ipsius futuros , quotiescunque occasio & potestas dabitur gratulandi, gestiendi, applaudendi . Quod cùm præstabitis, & uestra præsentia illum diem cohonestabitis, quo die lauream ab Agonothesia exiget, idem sibi, quod Themistocles, persuadebit, in quem cùm peregrini, qui conuerant ad Olympia, oculos intendissent, ex eo dicitur bellorum , quæ pro Græcia gessisset, amplissimam mercedem percepisse.

AD

AD IACOBVM PELETARIVM CÆNOMANVM.



Agnificam domum ex-
 tructuri, Audito. grau.
 vestibulū marmorcis co-
 lumnis fulciunt, ut ex a-
 ditu & limine totius ædi-
 ficij structura comprehē-
 datur. Hæc causa est quamobrem Pinda-
 rus in Agesia cursore cōptius proœmium
 arcessit, quod mihi quoq; in Iacobo Pele-
 tario desiderandū uideretur, nisi me nun-
 cium & nomenclatorem uerius, quàm
 Oratorem illi mandatum meminissem.

Quis enim ignorat laneam tunicā Agrico-
 læ, Regibus pallas purpureas decentius cō-
 gruere: neq; in dicendo negligenter cauē-
 dum esse, ut pro humilitate uel autoritate
 rerum ac personarum commoda oratio de-
 promatur? Nunc uerò, Auditores grauiſs.
 inquiet quispiam, quid Peletario & Agesiæ
 commune est, cur inuicem à te conferūtur?
 Equidem non inficior si mores, qui pro vi-
 cissitudine temporum mutantur, acutius
 intueamur, quādam nō modò inter istos,
 sed etiā inter superiores Athletas & Iatro-
 gonistas

gonistas dissimilitudinem posse inueniri. Verum satis, mea quidem sententia, instituto defūgar, cū paucis docuero perinde Peletarium in Iatriis, ac Agesiā in Olympiis decertasse, & utriq; parem in pugna animum roburq; adfuisse. Laudet igitur in cursore suo Pindarus vsū uaticinandi, & tum fortitudinem in subeundis periculis, tum in perferendis constantiam, quia neq; terra, neq; pelago citra discrimen uirtutes acquirantur. Quanquam quæ isthac Agesiæ diuinatio fuit, ab Iamidis introducta, ut ex pellibus uictimarum, si recta in frustra scinderentur, lætū: sin obliqua, triste omen portenderetur? Quæ uerò eiusdem uires, ut curru à mulabus ad metam traheretur, & impetus rotarum manu sisteret? Nam si ab euentis res ipsas metiamur, in promptu fuerit de Peletarij ingenio multipliciq; peritia ex eo iudicare, quòd pleraq; extare illius operū monumenta uideamus. Athletis propterea utilis futurorū præsagitio censebatur, ut nō temerè lacertos in arena periclitarentur, antequam de exitu aliquid prospexissent. Non est enim ambiguū certis diebus nos procliuiores, certis fieri tardiores ad quidpiam machinandum, siue quòd

quòd corpora non æqualiter perpetuò afficiantur, siue quòd cælestis quidã instinctus animis influat, à quo sinistri aut secundi negotiorũ successus impelluntur. Quare Mathematicæ, quæ uocantur, disciplinæ cùm unicuique, vt Platoni placuit, literas capeffenti sint necessaria: tum iis perdiscendæ, qui puluerem Iatricum meditantur. Numeris, criticæ febrium & morborũ rationes colliguntur: Geometria, figuræ, lineamenta, magnitudines, interualla, & ex proportionem, corporum habitudines absolute percipiuntur: ad eò vt ex uestigio pedis quãtus sit Hercules, & ex quãtitate qualis, & quemadmodum constitutus esse debeat, Geometrica fretus dimensioe Medicus auguretur. Quàm idem ab Astronomiã adiuetur experientia declarat, quandoquidem ex syderum ortu & occasu tam crebræ erumpunt in aëre mutationes, vt per eas potissimum morbi generentur. Qui autem stellarum naturas perspexerit, malignos illarum effectus repentè declinabit, & aduersus cæli inclementiam sic corpora teget, ut intemperiei & corruptelæ obsistât. Adhæc comperiet, ac in promptu expositam habebit medendi aut nō medendi occasionem, quia

quia potiones refragantibus astris parùm leuent, propitiis copiosè ac salubriter aluū perluant. Itaq; Hippocrates quòd immensum ex suprema Olympi contemplatione ad Medicinam emolumentum deriuaretur, apertè his uerbis demonstrauit, *ὅτι ἐλάχιστον μέρθ συμβάλλεται ἀστρονομίῃς ἐν τῇ ψυχῇ, ἀλλὰ πᾶν πλεῖστον*. Quapropter consultò fecit Iatrogonista noster, qui sic cupidè Mathesin est amplexatus, ut nihil in ea sit obscurum, quod non illuminarit, nihil abstrusum, quod nō inuestigarit. De cuius doctrina ne posterì dubitarēt, Archimedis nō tantum & Euclidis nodos ac numeros resoluit, uerumetiam in Astrologia, & cūctis mathematicæ scientiæ partibus adhuc conatur, ut non secus in posterum tractentur, quàm Aristotelis & Platonis seculo pueris statim post prima elementa tradebantur: interim ne viaticum instanti senectuti deesset, Medicinæ iam diu se vouit, quòd illa mutuo vinculo & cognatione quadam simul cum mathematicis cōsocietur. Medicinam autē primùm Lutetiæ cognouit, deinde Lugduni fecit, unde, pòst, in Italiam Brissacus imperator, qui prouinciam Pedemon-tanam pro Rege administrabat, cū asciuit,

quo

quo, ad ualitudinem, medico fideli, & ad bellicas susceptiones mathematico perspicaci uteretur. Est itaq; Peletarius, Auditor grauis. nō tyro nescio quis, non Neoptolemus & rudis miles, sed exercitatus Iatrogonista, & multis palmis alibi exploratus, & ad hæc Iatria iam pridem munitus, si ad modum Agesiæ prius currum ex mulabus iungere, ac apparatū certaminis adornare potuisset. Quamlibet enim gnauus sis pugnandi, quamlibet ad omnē gymnasij speciem expeditus, ad stadium non admittēre, nisi plaustro insignis, bene nūmatus & perbellē indutus apparebis: nec spectabere, nisi præsentiam spectatorum largitionibus, & lautitiis conuiuiorū illaqueabis. Tādem ergo Peletarius partim priuata industria, partim fratrum & amicorū auxilio, humerisq; subnixus, mularū currum ascēdit, ex quo citissimē ad scopū euolauit, coronam breui ab Agonotheta impositam gestaturus, & ex hoc tempore mulam sibi reseruaturus, qua per urbem uehatur in ædes ægrotorum.

AD NICOLAVM PETREUM Senonensem.



Vi diuitias bene agendi ministras & comites statuerūt, Aud. grauiss. mihi præclare videntur sensisse, quoniam rarò altius scandunt, & ad virtutis decus rapiuntur, qui aduerso Fortunæ flatu ac penuriæ angustiiis constricti distinentur. Quia enim res magnificas, & liberalitatis ac iustitiæ officia gerat, cui pecuniæ non suppetunt, quas populo ad gratiam largiatur? Itaq; apud Romanos ordo & cēsus eorum definiebātur, qui ad Equitum & Senatorum decurias trāsibāt: & in Gallia haud facilè ad Remp. aditus egenis patet, ne inopia premente quæstum sordidè faciāt, & undiq; compilent, quo domesticæ difficultati opitulentur. Quid uerò in Apollinis sacrario, & Musarum Regia? Vtrum locupletes soli dominātur, pauperes à penetralibus excluduntur? Equidem vt fatear quosdam tenui & infirma conditione in peritos aliquando emeruisse, plures tamen extitisse defendo, qui uacui cura & otio abundantes, nullaq; uictus sollicitudine

ne suspensi, quales ab Aristotele sacerdotes Aegyptij describuntur, ingenio libero artium principia nobis subtiliter pepererūt. Non temerè, Aud. grauis. hæc de diuitiis prætexui, proptereà quòd quemadmodum Pindarus in Arcesilao, sic ego in Petreo cōperi, quid ab ipsis uel ad urbana negotia, vel ad studia literarum adiumenti proficiatur. Arcesilaus pro fortuna opima Carrothum aurigam nactus, curru duodecies cursum cōpleuit, etsi eo in certamine cursores pleriq; aurigarū inertia concidissent. Petreus similiter in adolescentia tantundē, quantum multi toto uitæ spatio profecit, Iatriorum uictoriam adeptus, quā vix sperare audeant quadragenarij pugiles, qui in pugnis tot exerciti annos cōtriuerunt. Nā simul ac è cunis excessit, in Iacobi Tusani officinam, ut in Socratis scholam Theagenes, puer uenit, ubi molliter & ingenuè enutritus breui tempore magnas in Latia & Græca arena uires, dicēdiq; agilitatem conflauit. Beatum verò adolescentem, nec minus tali præceptore beatū, quàm quondam Alexander Macedo ferebatur, quod nasci sub Aristotele, ab eoq; limpidas philosophici fontis aquas haurire contigisset,
Scitis

Scitis enim, Aud. grauis. atq; vtinam expertus scire potuiffem, quàm familiariter Regius ille professor, quàm absq; fuco, semota procul doctrinæ ostentatione, quam hodie nemo docentium non affectat, fideliter iuuetutem imbuerit, minimas quasq; particulas, atq;, ut ferè nutrices solent, minutissima mansa in os inferendo. Hoc vnū nempe curabat ut publicæ utilitati feruaret, nihil strepitum profanæ multitudinis venaretur, audientium conatus vrgendo, interrogando, exercendo promoueret, ut Græcam sementem in agro Gallico spargeret, vnde postea fruges dulcissimas meterem⁹. Is Franciscus uerè Isocrates, is Socrates Parisiensis fuit, quo superstite viguit disciplina puerilis, sepulto, unà eodem tumulo benignitas professorum obruta est. Quin ergo iterum fœlicem Petreum exclamo, cui Tufanus thesauros omnes suæ sapiētiae demonstrarit? cui ea cognitionis arcana detexerit, quæ sophistæ nostri, & personati doctores integumentis obuoluunt, ut magis à vulgo non intelligente suspiciantur? Atq; hæc sunt prima istius incunabula, & tenella pueritiæ rudimēta, quæ deinde in Prelæo Petri Rami creuerunt, cū ad verborum

rum lumen Philosophiæ ac Medicinæ momenta accessissent. Cùm autem in notitiã artis suæ uelis remísque incubuisset, eius faciendæ causa in Monspelliensium Aca-
demiã conuolauit, quod ibi mysteria san-
nitatis abditissima tum legendo explicen-
tur, tum etiã in ipsa exercitatione propiùs
obseruentur. Etenim tyrones à sapiētibus,
& longo rerum usu doctis senibus manu
prehenfantur, & in opere discunt experiri,
quæ potissimùm remedia salutaria sint,
quæ quibus morbis potiones adhibendæ,
quoties, quando, & quorsum adhibendæ.
Et certè leuiter admodum, aut nihil omni-
no profunt magistrorum documenta, nisi
quò pertinent, illuc dirigātur, & ad subie-
ctum exemplum applicentur. Imò, ut elo-
quar quod sentio, magnificos semper dis-
putatores contēpsi, qui passim quidē Ga-
lenum & Hippocratem personant, sed nū-
quam ægrotum attingunt, nunquam her-
barum & pharmacorum facultates inue-
stigant: nec idcirco existimaui eos Peripa-
tético Phormioni absimiles, qui nunquam
hostē, nunquam castra uiderat, ac nihilo-
minus corā Hānibale loquaciter de re mi-
litari disputabat. Contrà Petreus sciētiam

primùm, deinde curandi commoditatem
 & experimentum percaluit, & (ut ad ter-
 minos institutæ comparationis redeam)
 gymnica consuetudine corroboratus ad
 hæc Iatria demum remigravit, atq; ad illa
 non quadrigis, quales Arcesilai fuerunt,
 sed immenso eruditionis plaustro uectus,
 stadiū biennio peragrauit. Deniq; Græcia
 præconij melos Arcesilao decreuit, quòd
 animum ætate meliorem pauisset, quòd in
 recta currus præcipitis moderatione lacer-
 torum motus & corporis habilitates pro-
 didisset. Opus est enim uiribus & alacrita-
 te ad domandos equos, ne à tramite defle-
 ctant, ne à scopo aberrēt, ne aliò diuagen-
 tur. Veruntamen ut mentem bene compo-
 nas, ut adolescentiæ ferociam cohibeas, ut
 ferues mediocritatem, ut ad metam Iatrici
 curriculi appellas, eò magis connitendum,
 quòd maiora in animo, quàm in corpore
 subsidia flagitantur. Quapropter ingratus
 sanè ac iniustus fuerit Agonotheta, si Pe-
 treū, quem doctissimi uiri fouerunt, Gra-
 tiæ aluerunt, uigiliæ perfecerunt, non ad
 lauream pro antea actis sudoribus offerri so-
 litam beneficentissimè concomitetur.

AD NICOLAVM RI-

cheletum Rhemensem.



Dio- Iogenem Cynicum, qui
homo factus fuit, Audi-
tores grauis, cum inter-
rogaretur, quonam quis
pacto laudis compos fie-
ret, respondisse aiunt,
si gloriam contemneret, qua ipse dignus
maximè haberetur. Est enim gloria per-
uagata & illustris bene meritorum fama,
quæ quò magis obruitur, eò erumpit ma-
gis, & uirtuti, quemadmodùm corpori um-
bra & imago, resonat. Itaque quauis Ni-
colaus Richeletus, ut est pudore ac uere-
cundia singulari, postulet nihil propemo-
dum de se dici, an ego propterea tacitus il-
lum præteream, cuius nomen tacente me
in uestros oculos & ora euolaret? Is autem
quoniam ridiculum putat ut præconio di-
gnitas generis & fortunæ inseratur, parebo
quidem in hac parte, nec de parētibus eius,
qui aliàs nobilitatis & rerum gestarū gra-
tia sunt tota Cāpania notissimi, quidquam
delibabo: at non permittam ut æquius à
Pindaro Alcimidam, quàm à me Riche-

letū oporteat prædicari. Fuerit enim istud Alcimidæ proprium decus ab amico Timida & Milesia unctore diligi, qui homines fidelitate & gymnasiorum peritia clarissimi temporibus illis commemorabantur. Nam Iatrogenistæ nostro nunquam viri graues, & scientia insignes defuerunt, quorum consiliis sese mirum in modum in aggrediendo Medicinæ studio incitatū, & in absoluendo sustentatum agnoscit. Inter quos primo loco numerat duos disputationum suarum eruditissimos moderatores Antonium Fournium & Antonium Tacquetiū: secundo beneuolos præceptores Syluiū, Gopylum, Petreium, Brigardum, Duretum, Lafileum, Alemanum, hos inquam omnes testatur sibi aliptas & amicos semper præfuisse, nihilq; unquam in uita sibi auspicius obtigisse, quā quòd talibus uiris charus esse potuerit, quorum rumoribus uniuerfa Musarum atria percrepant. Imò si quid ingenij aut exercitationis in Iatriorum arena explicauit, totū hoc, quātumcunque est (quod sanè maximum est) refert illis magistris acceptum, quos authores sibi fatetur quouis in negotio hætenus extitisse. At ita ne Nicolaus
Ri-

Richeletus existimationē refugiet, ut cuncta cæteris concedat, nihil sibi sumat, nihil arroget, nihil me de uiribus suis affirmare patiatur? Equidem nunquam uidi, nunquam legi, nunquam memini quenquam tantopere ab elogio abhorrentem, quàm istum, qui quantum nonnulli describi sua facta plenissimè flagitant, tātum uoluit sua ipsius obscurari. Atenim ego cū sciam Alcimidæ luctationem à Pindaro uersibus mandatam, in Richeleti uictoria sileam ut à collo apprehensos æmulos, brachiis, laterumque motu disiecerit? ut arma inimicorum, & faces fortunæ uiriliter obniten- do conculcarit? Hæc ut inuitus omittam, Audi grauius. & alia quamplurima, quæ in Richeleto contemplor, ulterius persequar, non sinam tamen eum frustratum Agonothetæ præmio, quod hac chartula nidebit sibi peculiariter in circo Parisiensis Antistitis reseruari.

IIII AD

AD IOANNEM LIEBALDUM Diuionensem.



latores si quando in tri-
uia incidunt, Auditores
grauis. incerti hærent
quod potissimū iter in-
grediantur, ut sine erro-
re quò tendunt, eò recta
semita perducantur. Eadem me propè du-
bitatio angit in proxima Liebaldi mentio-
ne, in quo tot tamq; uaria occurrūt, ut quò
perueniam ad id quod proposui, nesciam
qua primū uia sit in presentia insistendū.
Egōne ab ortu & maioribus captem initiū?
At ille me generis sui meminisse uetat, nec
in sua laude ponit si quid homines per se
non pariunt, sed ab aliis extrinsecus mu-
tuantur. An adolescentiæ studiis immora-
bor? At ea mauult in mentibus audiētium
ut impressa custodiantur, quàm in cuius-
quam oratione iactata repetantur. Quan-
quam si amor communis utilitatis, si cur-
riculum ætatis in iuuenum cura transmi-
sum superioribus progymnasiis existima-
tioni fuit, quid mihi nō licebit in Liebaldo
extollere, quod in Marchiana palestra Rhe-
toricum,

toricum, in Bellouaca philosophicum puluerem contriuerit? Quid non quoq; licebit dies noctesq; recensere, quas in gymnasiis trāsegit: ærumpnas, quas tolerauit: sudores, quibus arenam irrigauit? Veruntamen hæc vt liceant, mihi non ab hominis modestia permittuntur, qui potius de his, quorum liberalitate auctus est, quàm de se dici cupit, & alienam uirtutem in suo exemplo, velut in speculo vultum, relucere. Quamobrem quēadmodū Pindarus in Thrasydæi Thebani encomio Semelen, Ino Leucotheā Cadmi & Harmoniæ filias cū Herculis matre implorat, ut benignè faueant, & hymnum resonantes uictoris fœlicitati aspirent: sic ego Liebaldi beneuolos Mecœnates lubens obtester, ut clientis sui lauræ intersint, cuius æstus omni tēpore miserabiles recrearunt. Nunc ergo generosissimæ ex antiqua familia Pisselæorū fœminæ, Maria sacris virginibus apud Malumdum Pontifarēsem præfecta, & Carola Comitissa Pisselæa subeūt in mētem: quas fœminas si cum uoluptuario mulierū Thebanarum choro comparem, ne ineptè faciam haud iniuria reformido. Illinc enim libido fluxit, hinc pudicitia: illinc facinus,

hinc honestas: illinc dissensio, hinc cōcordia: illinc denique multa fabularum argumenta poëtæ decerpserunt, hinc scriptores veritatis imaginem possunt imitari. Pleni sunt libri, stuprorum, quæ Iupiter cū Alcmena, Ino & Semele turpiter perpetravit: Pleni uerò annales, rerū, quas Pisselæi heroes domi forisq; pro regnō Gallico prospere gesserunt. Sed de his nō est locus ut plura dicantur, quandoquidē in Mariæ solius gloria satis cumulata materies agēdi oblata uideatur. Nā ne illud exaggerem, quod uirgo uenustate, opibus, nobilitate princeps Christo uirginitatis suæ florem dedicarit, eiq; lubentius quàm mortali marito puella mortalis nupserit: ne illud, inquam, exaggerē, quod leuiter attendētibus rarū & magnū per se apparebit, quæ ista est humanitas, sapientia, bonitas, munificentia, uel si quod uerbū significātius excogitari potest, charitas, misericordia, ut studiosos homines foueat, & nostro Liebaldo patronam se ac alūnam hucusque liberalissimā præstet? Legimus fœminas apud antiquitatē interdum extitisse ingenuis disciplinis inclitas, quinetiā huius tēpestatis complures de nitore sermonis & sacra pagina continenter medi-

meditari. Hinc tres Corinnæ, Cornelia mater Graëchorū, Sappho, Aspasia Mileſia, Cleobulina, Anaſtaſia, Euſtochium, & innumeræ iſtiusmodi priſcis hitoriarū monimentis cōſignantur. Hinc noſtra memoria, ut matronas mediocris fortunæ taceā, duæ Margaretæ lilij Francici roſæ odoriferæ, altera Nauarræorum Regina, & altera Philiberti Emanuelis Allobrogum Ducis vxor, memorantur. Verūm quis unquā audiuit ut veſtitū & mollem cultum mulieres defraudarent? vt procliuius in Muſas, quā in torques & gēmas pecuniam erogarent? Quī autem tale aliquid de fœminis audiat, cū ne Cardinales quidem, Epiſcopi, Antiſtites, qui ſacerdotiorū prouentibus, quæ bona ſunt pietatis & literarū, utuntur, vel, ut verius loquar, abutūtur, Muſas hoſpitio ſuo, nedū miniſtros Muſarū alimentato dignentur? Fuerunt olim qui optimè de illis mereri auerent Mecœnates, qui re ipſa Mecœnates & patroni eſſent. Nunc deſiciente, niſi fallor, cognitionis ardore, qui eruditos amplexentur, præter quosdā poëtaſtros Lucianicæ impietatis flagitiſſimos inſtauratores, pauci omnino ex locupletibus nominantur. Quò magis unicam Mariæ
beni-

benignitatem decet admirari, quæ residuas à victu & cultu frugali copias iuuentuti erudiendæ, necessariisq; doctorum uirorum sumptibus impendit. At enim, Aud. grauis. quispiam idē mihi obiiciat, quod de Simonide circumfertur. Aiunt enim cū cœnaret Cranone in Thessalia apud Scopam fortunatū hominem, recitassetq; id carmen, quod in illum scripsisset, in quo quāplurima ornandi causa in Castorem scripta & Pollucē fuissent, nimis illum auarē Simonidem increpasse, se dimidiū eius quod patet effect, pro reliquo carmine daturū, reliquum à Tyndaridis, quos æquē laudasset, fructum, exigeret. At non itidem vereor, tamen si à Liebaldis persona sim aliquantū digressus, ut id damno imputetur, quoniam volūtarium Iatrogonistis omnibus elogiū decantarim, & Liebaldis se honoratissimū fore reatur, si virgini amplissime placuisse, totamq; Pisselæorum domū gratia deuinxisse, atque hac præsertim ratione conatus suos ad Iatria promouisse, ac proinde fructum laudis vltro concessisse intelligatur. Sed tamen hoc sibi propriū iurē arrogabit, quod Iatricū stadiū, ut Thrasydæus quondam Olympicū peragrauit, in eoq; uires

animi

animi non sine applausu astantium multo-
 ties explicauit: Mathematici qui astrorum
 conuerfiones specularunt, eos, qui sub Del-
 phino in lucem eduntur, pedum pernecitate
 ideo ualere contedunt. Physici autem quan-
 to splen minor sit, tanto nos alacriores fieri
 ratiocinatur. Ego utrum Liebaldus sub Del-
 phini sydere natus sit, aut minus lienis ha-
 beat, non inquiero: uerum mentis agilitatem
 expedita hinc illi conciliata affirmo, quod
 utraq; manu molem plumeam, hoc est im-
 probum laboris onus pertulerit, quod iden-
 tidem in Medicorum spatiis cursum redin-
 tegrarit, quod demum uictor cursus lauream
 ab Agonotheta coram fidelissima specta-
 torum concione postularit.

AD IOANNEM BORDO-
 nium Lugdunensem.



Vi de hominibus ex eo iudi-
 cant, Aud. grauis, quod lin-
 gua sint hesitantes uel diserti,
 perinde faciunt atq; si statuas,
 quoniam appareant extrin-
 secus inaurate, aureas continuo arbitrentur.
 Sic enim se res habet ut, quemadmodum cla-
 rius

rius uacua uasa, quàm repleta, tinniunt: ita parcius viri eruditi loquantur, cæteri uerborum sonitus nulla subiecta sententia neque scientia inanes effutiant. At uerò artes, quæ summæ nuncupantur, & ad usum uinculi ciuilis conferunt, aucupia literarum, & syllabarum tendiculas respuunt, magisque ex rebus & ex ueritate ponderantur. Nunquid enim Athleta garrulitate, non lacertis dimicabit? Aegrotus Medicorum clamoribus ac sermone, non pharmacis & potione conualescet? Quamobrem meum semper de Medico iudicium fuit, quod Ciceronis de Philosopho, ut si ualeat eloquentia, non asperner: si egeat, non admodum desiderem. Quanquam curiosè nimium simulacra & umbras rerum quidam sectantur, qui quidem non attedunt quæ preciosa sunt, ea, ne polluantur, cordis penetralibus, uelut gemmas fasciis solere occultari. Fuit apud Athenienses nobilis pugil Dioxippus, isto (ut opinor) cognomēto, quòd equos pariter & hostes acerrimè stimularet. Qui, etsi magna ubiq; in gloria esset, tamen Horrotas miles inermem eum conspiciens, irrisum despectumque duello lacerassiuit. At Dioxippus accepta conditione
Horrotam

Horrotam læcea truculēter irruentem exiguā primū corporis declinatione uitaui, deinde stipitis, quem pro armis sumpserat, ictu pessundatum maētavit. Quod si Bordonius non istam linguæ uolubilitatē ambiat, quam nonnulli, qui curam suam in fūco & ornatu dictionis totam defixerunt, ne protinuseius ingenium, quod in solida Medicinæ scientia uersatum est, inuidiosius eleuetur. Etenim quī obscura illius doctrina esse possit, qui non modò succissuas horas, at etiam integrū studij tempus priuatis uigiliis transēgit? Qui à strenuissimō Equite Podiogarellio Regis Christianissimi prægustatore fidelissimo ad filium erudiendum fuit ingenti pretio inuitatus? Nam cū optima hæreditas, quæ liberis à parente traditur, omni patrimonio securior, est cognitio disciplinarum, & æmulatio rectè factorum: tum maxima cautio adhibenda est, ut pædagogi, quales erant antiquitus, iidem docendo atque uiuendo præstantes deligantur. Verū locupletius adhuc acuminis & prudentiæ suæ specimē Bordonius exhibuit, quēdo in Iatriis unus non Horrotam, sicut Dioxippus, sed septēdecim progymnasios, & quoslibet Iatrodic-

cas ad pugnandū admisit, nulla ui, nullis machinis, nullis unquā illorū infidiis percussus. Quoties uerò nō sagittis uocabulo rū, sed fulminibus sententiarū aduersarios oppressit, cum ipsi vulnerū dolore correpti sibi que diffidētes arena excedere cogerentur? Cæterum, Aud. grauis. pro frequenti agitatione, florentiq; uictoria, præmio ab Agonotheta postridie donabitur, eandem à vobis, quam Dioxippus ab Alexandro nominis celebritatem redempturus.

A D P E T R V M R A V I -
nium Lutetianum.



Ræcones ludorum gymnicorum, Aud. grauis. non ex sophistis & poëtis de populo, sed doctissimis quibusque deligebantur, qui palæstritas orationis suæ iucunditate flecterent, & proposito mercedis fructu ad uehementer dimicandum pro gloria stimularent. Sic enim facere Imperatores etiamnum uidemus, ut tubæ clangore ferocitatē equorum incēdāt: ipsi autem acie ordinata promptissimos ad

præ

præliandū milites adhortentur. Ex eorum numero, qui uerborū sono & impetu linguæ ignauos erigere, fortes recreare in Olympiis iuebātur, fuit Archias Hyblæus, homo Græca facundia inter Græcos ornatissimus, & inter Athenienses vnus atticè imprimis diserteq; loquutus. Vt uerò in fabulis histriones multa cōsuetudine discunt eius personæ mores imbibere, cuius habitū gestumq; crebrò in scena repræsentarunt: haud secus Archias grauissimò præconis munere aliquādiu defunctus cœpit ardere desiderio currendi, & laudes à posteris repositere, quas antea cæteris detulisset. Mirabitur fortasse quispiam, quorsum hæc ita sum præfatus, quanquam si Rauinium, ad quem mea dirigitur oratio, bene nouerit (nosse autem quiuis mediocriter eruditus potuit) vnà & mihi quod dico aptè inuentum assentietur, & neminem Archiæ similiorem, quàm hunc Rauiniū existimabit. Etenim quæ certior hominum inter se similitudo existat, quàm uoluntatū honestissimarum societas, studiorū coniunctio & facultatis? Rauinius ab incunabulis parentū beneficētia liberaliter institutus, postquam ex Rhetorica & Philosophica professione expe-

expeditam dicēdi differendique scientiam
& copiā contraxisset , in hacce palæstra la-
trogonistas , non aliter quàm Græcus ille
Orator Olympionicas singulari verborum
delectu, exquisitisq; sententiarum lumini-
bus exornauit. Magnū haud dubiè munus,
Aud. grauis. & penè omniū, quæ à nostris
doctoribus in Acadēmia suscipiuntur, dif-
ficillimum: omnium uerò quæ difficillimè
peraguntur, unū, ut ausim affirmare, ma-
ximè ad agentis famam lubricū, & ad nō-
nullorum beneuolentiam minimè, ut licet
experiri, gratiosum. Tu enim cum infini-
tis dierum noctiumq; lucubrationibus ad
declamitandum parata commētatione ue-
neris , & audientium uoluptati penitus sa-
tisfeceris , nullum tamen istius officij præ-
mium , præter inanem nescio quem susur-
rum consequēre: at si uel crudo & malè af-
fecto corpore , uel animo molestia præpe-
dito tantillum in motu deliqueris, uoce ir-
raucueris, vultu nimīā seueritatem indica-
ris, timendum continuò ne irrisus & exhibi-
latus ad turpissimā dedecoris memoriam
explodare. A quibus? A rusticis & insulsis
nebulonibus, qui quoniam uirtutes expri-
mere non possunt , peccata contumeliosè
criminantur:

criminantur. Quò magis magisque nostro Iatrogenistæ gratulandū est , qui salua fama è scopulis emerfit, ad quos afflicta quāplurimorum naues & naufragio depressæ corruerunt . Veruntamen periculo liberatus à periclitando non destitit, sed ut fortissimum virū decet continenter in laboribus & periculis exerceri, à discrimine rumoris ad capitis discrimen , & ad confertissimas Medicorum disceptationes profiliuit, motus, nisi fallor, Themistoclis acroamate, qui rogatus utrum Achilles an Homerus esse mallet , se Achillem malle respondit : uel etiam ad Archiæ exemplū eas pugnas tentare uoluit, quarum prius ipse laudator & spectator extitisset. Ineptus essem si qualem se in arena præstitit, in præsentia refricarē, & è ludo egressum rursus in ludum à calce ad carceres reuocarē. Longè uerò ineptior si de illius honore afferendo tam sollicitè cruciarer, cuius industriam experiētia, experientiam euētus cōprobauit. Quid enim plura de Rauinij contentionibus sciscitari aueatis, quem uos desudantē hætenus suspexistis? nunc eundē in triumphatium ordine sedentem cernatis? Cæterum Archiæ Græco, propterea quòd in Olympiis uicisset,

set, plebs statuum locauit: uester Archias, qui stadium Iatricū paulò uirilius percurrit, nihil mercedis inde flagitabit? Imò iam ab Academia Rectorios fasces, quos Galli-ci Apollinis insignia maiores nostri fore statuerunt, pro innumerabilibus in Remp. literariam meritis obtinuit: mox etiam ab Agonotheta diuturniorem palmam, & à vobis honorificentius præteritæ uirtutis testimonium impetrabit.

AD PETRVM BELLO- num Cænotanum.



Vi viatorū contentiones uituperant, Aud. grauis. Lycurgi autoritate fulciūtur, quē ciuibus suis inhibuisse aiunt, ne patria egressi in remotas sedes demigrarent. At nō expendūt id à legiflatore cautum fuisse, ut leges suas ea ratione firmaret, cū de aliorum populorum moribus nihil Lacedæmonij cōperissent. Aliàs enim dubiū non est, quin vir consultissimus ualde probaret commercia, quæ inter uicinos mutuò colligantur, in quibus insita locorum vitia contrario usu emen-

emendatur, & inuicem salutaria uitæ ac Reip. gubernandæ instituta cōmunicatur. Quapropter melius quidem uidetur sanxisse Plato in eo, quem finxit, ciuitatis statu, ut pueritiam & adolescentiā in vmbra-tili studio Græci degerent, tum à trigesimo anno inciperet experiri, ac proinde in perpetua peregrinatione reliquum æuum consumerent. Vnde Hippocrates in Philosophiæ ac Medicinæ gremio nutritus, solum vertit, & multas mūdi regiones perlustrauit, ut in rebus præsentib⁹ exploraret, quæcunque de illis scripta legebantur. Id quod etiam à Democrito, Pythagora, & ueteribus philosophis factitatum historiographi meminerunt, ut per terras & maria eò ferrentur, ubi sperarent se præceptionū, quas de artibus explicassent, utilitatem aliquam percepturos. Quòd si quis est, Auditores grauis. qui post expugnationē Troiæ quāplurimarum gentiū ritus & urbes uiderit, is apud Græcos Vlysses fuit: si quis itē qui post Galliæ patefactum Oceanum sapientior à peregrinādo reuerterit, is erit profectò Bellonus, quem ideo Vlyysi Homérico non ineptè uidebor assimilasse. Etenim Vlysses uastata Troia, cū ad reditū pro-

K ij peraret,

peraret, siue fluctuum procellis ingruentibus, siue Diis ita uolētibus diuturno errore agitatus est: & donec cæli ambitum circuiuisset, nūc in Cyconū littus, hinc in Africam, tum in Siciliam, & in Aetoliam, inde ad Læstrigonas, ad Circen, ad Scyllam & Charybdim eiectus. Qua in nauigatione si quādo naufragij horror immineret, Mercurij & Mineruę præsidio sospes emerfit, demūmq; præter omnē expectationem, patrios penates & Itacæ focum recepit. Bellonus autem Gallia sponte decedens, in Italiam, Hispaniā, Arabiam, & cæteras, quæ quatuor Olympi cardinibus subiacēt, tam habitabiles, quàm inhabitabiles provincias deuolutus, non modò populorum mores & religionem, verumetiam situm, aërem, & cuncta, quibus affluunt, metalla, herbas, pisces, frutices, belluas, uolucres indagauit, qua ex inquisitione plusquā Vlysseam prudentiā, & in Naturæ miraculis occultam subtilitatem conflauit. Sed, heu! quæ interim mala, quas miserias in tā districtis finium interuallis tolerasse illum existimatis, qui nullos comites itineris haberet, quos ipse nosset, quibus sensa exprimeret, quibus consilia detegeret, quibuscū amicē

amicè loqueretur ? Veruntamen cùm pro insatiabili cognitionis desiderio molestiam vlrò deuorabat, tum se præsertim ex eo solabatur, quòd apud Principes uiros, quorũ in uia beneficiis erat subleuat⁹, & apud posteros, quorum commodis seruiebat, gratiam esset non infimam initurus. Quos ut arctius deuinciret, commentarios laborum suorum exarauit, in quibus vniuersa per vnius noctis lucubrationẽ absq; tædio cernerent, quæ pluribus annis ipse cum periculo inuestigasset. Atque hi commentarij, Aud. grau. tenebras à nobis prius inextricabiles dispulerunt, cùm de piscium nominibus & affectionibus, de plantis & huiusmodi, quæ in Asia & Africa uisuntur, propter ignorationẽ labaremus. Quare Carneades ille nostri temporis Cardanus Bellono non nihil refert commodatum, & in afferendis Naturæ arcanis eo authore, ut idoneo & assiduo fideiussore nititur. Quòd nisi præsens uirtus sorderet, ac si tãtundem in Gallia, quãtum alibi merita nostrorum hominum penderentur, certiùs pollicerer fore aliquando, ut pluris Belloni peregrinationes, quàm Vlyssis: nec minoris eiusdẽ libri, quàm physiologicæ Plinij & Ari-

stotelis obseruationes æstimaretur. Verùm quæ isthæc stoliditas, quæ ista, quam toties lamentor, opinionum pestis, ut Galli Gallicam industriã aspernemur, ut à peregrinis nos ingenio superari annuamus, & si arx munienda, si domus ædificãda, si quid subtilius aut elegantius moliẽdum, procul ex Italia uel aliunde operarios asciscamus, cùm hîc & uigilãtiores, & (ut pro mea veritatis enunciandæ licentia dicam) fideliores nanciscamur? Sed quando ista inueterauit pestifera cõsuetudo, frustra conor labefactare, frustra mentẽ gentis nostræ corrigere, quæ sic tenaciter adhærescit, ut citius vrbes ruituræ sint, quàm contractũ de aduenis iudicium conuellatur. Quocirca non me peruicaciũ torquebo, ut Bellonus sit ea existimatione apud nos, qua peregrini, aut qua etiã ipse apud peregrinos. Attamen, si placet, Aud. grauius. illud à uobis extorquebo, ut quemadmodum Vlysses in disci iactu laudem à Phæacensibus retulit: sic iste postremò in iis Iatriis laurea cinctus acquiescat, ubi si non celeritatem fractus itinerum longinquitate talẽ præstitit, qualem qui in porticu & vmbra defides latitarunt, saltem curauit, ut lacertorum vi pedum

dum imbecillitatem suppleret, ac nonnullo-
rum linguæ volubilitatem sententiarum
grauitate præteriret.

AD STEPHANVM GOVR- meleum Curiosolitam.



Eruagatū est illud Græ-
corū prouerbium, Aud.
grauis. ut ad quam quis-
que artem natura sit ap-
positus, in ea connitatur,
neque quidpiā alienum
à suo ingenio concupiscat. Idem penè Pin-
darus in Chromij Aetneī hymno usurpat,
ubi, quoad licet coniicere, Athletam suum
admonet, ne à palæstra in quam est procli-
uior, ad aliud obscurius studium conuer-
tatur. Et certè multorum in historiis no-
mina inueniuntur, qui cū uel impruden-
tia, uel lucri opinione, uel precibus paren-
tum sese inuita & repugnante Minerua a-
licui uitæ instituto applicuissent, illud mu-
tare coacti sunt, quod in eo nihil sibi pro-
mouere, quālibet incumbentes, uideren-
tur. Ac ne externa conquiram, ecce Ste-
phanus Gourmeleus apertè indicabit, quā

irritum sit more Gigantum bellare cum Diis: quod nihil aliud esse interpretor, quã Naturæ aduersari. Nam cùm is suapte spõte ad Medicinam mirabiliter raperetur, & ad illam sese philosophicis & optimis disciplinis muniuisset, tamen à suis ad Iurisprudentiam obiecto emolumẽto est reuocatus. Cuius rei causa Tolosam detrusus, etiam si nocturna diurnaque manu Iuriscõsultorum chartas reuolueret, nihilo se sapientiores & doctiores fieri sentiebat. Instabat autem eius oculis Medicina, virginali facie habitûque decoro, & animum blanditiis amoris sui inescabat, ac si repudium Iurisprudentiæ nunciare uellet, locupletissimam dotem, & integrum patrimonij sui vsumfructum obligabat. Quapropter Gourmeleus, qui propẽsius istam in partem inclinabat, repente impellitur, ut arcem legũ Tolosam deserat, ac Medicinæ sacris in hoc auspicatissimo templo initietur. Hinc tres quatuor ue annos priuatæ commentationi addictus quieuit, temerarium fore suspicatus, ut de puluere statueret, antequam arma omnia domi comparasset, quibus ad pugnam uehementem uti expediret. Porro prolusioni & xysto asuefactus

suefactus, cùm se alterum Chromium, & literis plenè tinctum atque coloratum perciperet, atque restare unum illud intelligeret, ut cœtu publico de doctrina periclitaretur, fama istorum subselliorũ pellectus adscribi se in ordinem Iatrogonistarum curavit. Quid tum? Biennio æstus continuos & laboris difficultatem exhaustit, atque nũc Galeni & Hippocratis, qui principes & aucthores hisce Iatriis initiũ dederũt, technas fideliter tyronibus detegendo, nunc corpus suum audacter progymnasiorum telis opponẽdo, meruit ut hodierno die brauij spẽ ex Agonothetę mandato exploratissimam opperiat.

AD PAVLVM PEZERO- nem Curiosolitam.



Vi patriã in laude aut probro alicuius ponunt, Aud. grauis. non penitus ratione carent, quoniam mores ab ipsa locorum conditione, & à uitæ consuetudine suppeditantur. Ac ut non eundem ubique aërem spiramus, sed in terris, quæ propinquo fluctu & fluuio alluun-

alluuntur, crassum & concretum: in montibus, qui sereno cælo patent, purum ac tenuem: sic etiam gentibus singulis sua uitia uel probitates ingenerantur, à quibus si maximè cupiant, nullo modo discrepare possint: Itaque Carthaginieneses fraudulentique quondam & mendaces, sed bellicosi: Græci uani & garruli, sed industrij: Romani superbi & arrogantes, sed armis & imperio præpotentes iudicabantur. Quinetiam in Christianis populis multiplices naturas & recessus notarè, nisi odiosum & infestum mihi fore metuerem, ne ueritas orationis nonnullorū inuidiam instigaret, quiordes incunabulorum suorum, & natalitij soli leuitatem nudari erubescant. Pindarus autè in Phylacida Quinquatrij uictore insulam Aeginam miris encomiis perstrinxit, forsitan ratus (id quod Themistocli dicitur Syssiphus quispiā obieuisse) illum non ex sua, sed ex patriæ gloria splendore assequutum. Atenim Aegina Achilles, cunctique Græcorum militiæ magnanimi ductores oriundi ferebantur, adeò ut consentaneum esset, qui Aeginetas nasceretur, eum aliquando in castris & acie dominari oportere. Quòd si ea in uobis opinio infideat,

deat, Aud. grauis: quid non lubebit hoc
argumento Paulum Pezeronem decanta-
re, quòd in Britannia originem à Curioso-
litis traxerit: quæ natio vrbium pulchritu-
dine, salubritate, descriptione, adhuc ciuiũ
factimonia & fortitudine inter Gallos ma-
gis, quàm inter Græcos Aegina celebre-
tur? Licet enim undique mari Curiosolitæ
cingantur, licet ab Anglia, Dunia & ho-
stilibus oris terrores intententur: tamen
semper Curiosolitæ, & ab incursionibus &
curis soluti ac liberi ad hunc usque diem
restituerunt. Erit uerò Pezeroni illud im-
primis ornamento, quòd in regione illustri
primas gratiæ possideat apud clarissimum
medicum Corentinum Beguetum, & no-
bilissimum virũ Petrum Quermoriacum
eius prouinciæ præfectum, reliquosq; Bri-
tanniæ totius moderatores, quorum li-
beris nepotibus ue magna fide ac uigilan-
tia Lutetiæ præfuit. Verum is nõ tam pro-
uinciam & patronos iactat, quàm docto-
res, quorum monitis & præceptis secun-
dum ad ista Iatria cursum fuit consultò
auspicatus. Nam cum patriæ, quæ spiritũ,
cum patronis, qui uictũ impertiunt, mul-
tum obligati sumus: tum uerò magistros,
qui

qui benè uiuendi & scienter intelligendi
uias indicant, præcipuo cultu uenerari de-
bemus. Qua de causa prisci non tantùm pa-
læstritæ, uerumetiam illorum aliptæ corā
per præcones pronunciabantur, quò uictō-
riæ partem, & prosperos pugnarum euen-
tus quodā sibi iure uendicarēt. Ac proinde
Pezero ab iis longè dissentit, qui ut extol-
lantur à vulgo, dissimulant se cuiusquam
opera in prætexendis studiis adiutos : cen-
setque si ego præceptores, quorum doctri-
na creuit, nominauero, nonnihil ex ista
mentionē dignitatis ad se redundaturum.
Nam si domini ad seruos, opificis ad tyro-
nes, Imperatoris ad milites fama & expe-
rientia influat, qualem eum euasisse colli-
gatis, quem Iacobus Carpentarius ætatis
nostræ Chrysippus Philosophiæ oleo per-
fudit? quē Gopylus, Brigardus, Duretus,
Lafleus, Petreius, Alemanus, Greal-
mus, Alanus peritissimi aliptæ vnguentis
Medicinę asperferunt? Is ergo, Aud. grau.
congruum patriæ & dignum magistris a-
nimum ac robur gerens, in Iatriorum cur-
riculo sæpius docuit, quantum homo Cu-
riosolita in Parisiensi pulucre uolutatus la-
terum firmitate præpolleat.

O R A T I O N V M I N D E X.

I.	Oratio Prima.	pagina 7
II.	Oratio Secunda.	33
III.	Oratio Tertia.	55
IIII.	Ad Iacobum Carpentarium Bellouacum.	77
V.	Ad Ioannem Nestora Lutetianum.	83
VI.	Ad Antonium Prunerium Lingonensem.	87
VII.	Ad Claudium Ballium Cabillonensem	93
VIII.	Ad Iacobum Hufteum Baiocensem	96
IX.	Ad N. Odoardum Lutetianum municipem.	101
X.	Ad Io. Rochæum Heduum	105
XI.	Ad Mauricium Cordatum Rhemensem	111
XII.	Ad Claudium Carlotum Nouiodunensem.	113
XIII.	Ad Iacobum Peletarium Cænomanum.	121
XIIII.	Ad Nicolaum Petreum Senonensem.	126
XV.	Ad N. Richeletum Rhemensem.	131
XVI.	Ad Io. Liebaldum Diuionensem.	134
XVII.	Ad Ioannem Bordonium Lugdunensem.	139
XVIII.	Ad Petrum Rauinium Lutetianum.	142
XIX.	Ad Petrum Bellonum Cænomanum.	146
XX.	Ad Stephanum Gourmeleū Curiosolitam.	151
XXI.	Ad Paulum Pezeronem Curiosolitam.	153

Pagina 62, versu 25, lege homunculi.

PRIVILEGII SENTENTIA.

CAutum est auctoritate Francisci II. Francorum Regis, ne quis alius, præter Federicum Morellum typographum Parisiensem, Hasce Ioannis Veteris Orationes in Medicinæ commend.&c. ante sexennium ab hac prima editione excudat, né ue uendat. Qui secus fecerit, libris & pœna in sanctione æstimata multabitur. Priuilegium Parisiis irrogatum ac consignatum, Iunij X X I. Anno M. D. L X. Subscriptum de consilij sententia,

DELYG.



